

کرا با لظو

صبري؛ عزت  
كدا بالطو: عزت صبري-القاهرة: دار الرسم بالكلمات للنشر والتوزيع / القاهرة:  
٢٠١٧.

٢٠٨ ص؛ ٢٠١٤

تدمك: ٩٧٨-٩٧٧-٦٥٠٢-٥٥-٠

رقم الإيداع: ٢٠١٦/٢٥١١٩

دار النشر: دار الرسم بالكلمات للنشر والتوزيع

عنوان الكتاب: كدا بالطو

الكاتب: عزت صبري

تاريخ الطباعة: ٢٠١٧

تصحيح لغوي: عبدالله أسامة

تنسيق داخلي: سمر محمد

تصميم الغلاف: عبير وارث

رسومات داخلية: عبير وارث

إشراف عام: محمد المصري

جميع حقوق الملكية الأدبية والفنية محفوظة للناشر



elrasm.blkalemaat



elrsmblklemat@yahoo.com



01061419555

# کرا بالظہر

عزت صبري





# إهداء

لأختي "مها" رحمها الله

"لبنتها" أم الخدود

ل د . إلهام عوض

لسارة سعيد . . صديقتي اللودة

لضحى الجندي وكل بنت طولها ١٥٠ سم

لبيسو ومينا وعبدالله وكريم بيومي . . صحابي اللي لسه ما باعوش

لخالي المهندس : عمر ثابت

لكل اللي ضحكوا للحياة ما أبكتهم .



## مش مقدمة

مبدئياً دي مش مقدمة إعتبروه مجرد تنويه أو شرح سريع للدنيا اللي  
هتقابلوها جوه الكتاب ده . . الكتاب مش مادة علمية . . ولو إنت  
فاكر إنك بعد ماقرأ الكتاب ده هتطلع بحاجة مفيدة تبقى غلطان . .  
إحنا مش جاينين نضيف للأدب شئ ولا حتى لقلة الأدب . . ببساطة  
شديدة الكتاب ده نافه جداً هتخلصه وتكتشف إنك مخرجتش منه  
بشئ غير حبة ضحك . . فأنا عشان موهمكش وأبقى ضحكت  
عليك هجتهد فإني أضحكك وده تقريباً بقا شئ صعب في زماننا  
الأعبر اللي عايشينه . . فخلينا نخش في الموضوع على طول.





# طوارئ

كونك إستقبال طوارئ في مستشفى في مصر فإنت بتعرض لكل ماهو غريب.

- سماعليقوا الحمام منين لو سمحت ؟

- سماعليقوا الكافيتريا فين ؟

- سماعليقوا أختي جت هنا ؟

- سماعليقوا عازة ضاكتور الروميتزن لأمي

- سماعليقوا بنت خالشي لسه والدة الأقيها فيين ؟

- سماعليقوا فيه جينة برايميلي ؟







## نموذج طبي ١١١

في يوم أثبتلي إن يوم التلات ده منتشر في باقي الأيام روح عشان آخذ نموذج طبي ١١١ لتقديمه في cv طلبته إحدى المستشفيات للشغل فيها . . أول ماوصلت دخلت أوضة فيها كمية مكاتب ومدايات.

- صباح الخير يا مدام سوسن ؟

- مين مدام سوسن دي انا مش مدام سوسن يابني .

- ماعلينا عاوز نموذج طبي ١١١ .

- ده فوق عند أوساز عادل .

- مم طيب مش عندك هنا ليه ؟

- يابني ماتطلع فوق .



- طيب شايف ايدي فيها زيت والنبي يا مدام قدرية هاتيله نموذج ١١١ من عندك.

- هووووف إستني بقا يا أوساز عادل أما أشوف المخروب ده \*الكمبيوتر\*

- طيب روح مكتب أوساز رجب .  
- حاضر .

\*بروح وبرجع ثاني\*

- هو مين أوساز رجب ده كمان وفين مكتبه أصلاً ؟  
- آخر الطريقة ثاني مكتب ع الشمال .

ويدوب أول ما قربت من مكتب أوساز رجب والآفيلك خناقة وناس نازلة  
ضرب في موظف تقريباً هو أوساز رجب .. \*وفي عز الخناقة ما دايرة\* ..  
لو سمحت يا اوساز رجب أنا عزت كمت عاوز نموذج طيبي ١١١ باعتني ليك

أوساز عادل عشان إيدته فيها زيت وفيشة الكاتيل بايظة ومدام قدرية مش  
طايقاه ولا طايقة الكمبيوتر ولا طايقة الشال اللي لبسناه .. مم طيب اجيلك بعد  
الضرب سماعلقوا .

\*رجعت لأوساز عادل تاني لقيته لسه مخلصش .. هااار إسود ياعم  
كفياك حشوبقى \*

- أوساز رجب مش فاضي .

- طيب بص إنزل دور واحد بس وإسأل عن أوساز عصام هتلاقيه عنده

\*نزلت لأوساز عصام لقيته حاجة كده اللهم صل علني تبصله من اي حمة  
تحس إنه بيكرهك \*

- سماعيلقوا يا اوساز عصام اوساز عادل بيقول لحررتك اديني نموذج طبي

١١١ عشان محدش فاضي يديهالي .

- اه وانا بقا يعني ياخويا اللي فاضي !



- اه والله حررتك فاضي اهو .

= ياعم إتكلوا ع الله تفرقوناش وقول لأوسااز عادل بطلوا ترموا شغلوكوا ع  
الناس .

\* طلعت وأنا بفكر في فيلم The Shawshank Redemption وإزاي أقدر  
أهرب م السجن بعد ما قتل أوساز عادل وألف شال مدام قدرية على رقبتها  
أخنتها وأشد كابل الكاتيل اكهرب بيه أوساز عصام وأعترف بقتل أوساز رجب  
بالمرة اللي هيكون مات في الخناقة \*

- خلاص يا بني أنا تعبتك تعالى مد إيدك خده إنت وهتروح لمدام عواطف  
جنبي أو نجلاء تنف عليها تقين والأستاذ محسن اللي معاه الختم اللي  
حاطط الشاي عالمكتب عشان بين إنه جه رغم إنه مزوغ من ١٠ الصبح  
وقافل عالختم بالقفل خليه يحتملك تلت أختام وتعالاي هنا هتبقى  
الساعة ١٠:١٢ فهتعددي عليا بكرة للأسف لأن الحزنة قفلت وبكرة رايح  
لحماتي فنص يوم وأنا هقول أني جاي وما أجيش ، مالك مكشتر ليه ؟

- يا أوساز انت يا أوساز يابتاع نموذج ١١١ إتفضل.

- هاه !

- هاه ايه . . النموذج أهو خد روح إدفع بقا الوصل ده للخرنة . . يلا مع

السلامة.

- ..... !

ومن هنا بدأت رحلتي مع المستشفى العجيبة اللي إشتغلت فيها .







## لباس مودي

في إحدى نبطشيات استقبال الطوارئ قاعد بفطر وبسقي بؤسماط في شاي  
بلبن زي باقي الخلق مابتمارس طقوسها العادية الصبح .. لقيت ست دخلت  
عليا شائلة ابنها ..

- لو سمحت .

- نعم ؟

- لو سمحت .

- ياولية منا سمحت اهووو إخلصي الشاي بلبن هيبرد .

- ألا هو فين الحمام اللي هنا ؟ ل احسن مودي ابني بيسهل ومغرفني .

- يارتني ماسمحت .. الله يقلب بطنك ع الصبح انتي وابنك .. الحمام  
كدا عند العيادات .

= ماشي شكرًا .

\* وشالت الواد وانطلقت تسعفه بجراه وسابتلي ريحته في المكان \*

- يلا مش مهم . . ألحق اسعف انا كمان البؤسماطاية اللي هتبوش دي .

كملت سقسقة . . فدخل راجل كبير ماسك بطنه ومعاه ولاده . .

- لو سمحت لو سمحت .

- أيوة احج اتفضل ريجوه ع الشيزلونج طيب يا جماعة .

- لاء لاء انا عايز الحمام .

- هاااار اسود هو في إيه النهاردا ! إبتوا بيوزعوا عليكموا أكل بره يقلب

معدتكموا ! الحمام كدا يا حيج وابقى طمني ع الواد مودي عمل ايه .

\* شوية وخرجت اقف قدام الاستقبال لقيت الواد مودي طالع م الحمام مش

لابس حاجة غير فائلة . . بس وواخذ في وشه ويبجري واه وراه ! \*

= موووووودي . . أه يابنكلب يا جزمة يا قارفي يا واد خوووود البس لباسك

يا واد . . موووودااااي \* وقامت مصوتة ونازلة وراه على تحت ! \*

\* شوية وحت بت بنهج \*

- ساموعليقوا انا خالة مودي الصغيرة.

- الحمام كدا .

- لاء انا مش عازة حمام . . أختي بتقول لحضرتك تعالى لمودي عشان مش

راضي يلبس لباسه .

- نعم ياختااي! يعني إيبه مش راضي يلبس لباسه! دي في حد ذاتها

حالة طارئة.

- أه ما هي بتقولك تعالى والنبي ألك هتديله حقه كدا وكدا عشان

يخاف ويلبسه .

- اممم قربي اقولك . . شايفة جهاز الضغط دا؟!

- أبوة .

- دا الخبطة منه به غرز - أمشي من وش أمني لا فتح دماغك انتي ومودي  
وامه والحج اللي قدم على هجرة للحمام دا وماخرجش من ساعتها ..  
ياحج اخلص بقا انت كمان عاز اخش - إنت واكل إيه!

#يوم الخراء العالمي .

#أم مودي بتروح تشكيني لمدير المستشفى .. "في إهمال وتقصير في حق لباس  
مودي ابني" .

#أنا بشبه ع الشبشب اللي في رجل الواد مودي دا .. خووود يالا شبشب  
الحمام يالا .

#لاء كدا مش نافع اندهولي الأمن ييجي يخرج الحج م الحمام .







او سار غسان .. اوجك .. ماتا كولنیش  
ماتسینیش .. ماتسینیش .. انت لسه ماتسینیش !!





قامت جاية واقفة ورايا وققشة في الاسكراب بتشد فيه . .

= دا غسان جوزي .

راح مزعق وقايلها بطبقة صوت تسمعها تما سيح مستنقعات أفريقيا: وديني ل  
افتحك يا عفاف بقا انا تقويلي رايحة للخياطة وتطلعي رايحة ل امك ! دنا هطلع  
تبيت أمك .

- إهدى بس يا أوساز غسان مايكن امها اشتغلت خياطة .

= أسكت انت .

- حاضر . . يا عفاف سيبي أم الاسكراب بقا قفايا سلخ .

قام شاخط فيها: خووووودي هنااااع، خوووودي ل احسن قظما عظما  
افتحك كرشك مش دماغك بس .

ردت عفاف بعد حباية شجاعة خدتها وقامت قايلاله: بقا انا تمد إيدك عليا  
ياشمام يابن المبقعة، دانا هفرجك انا وامي بس استنى عليا . . دانا كانوا بيضربوا  
بيا المثل .

- بس بقا اغفاف اهو ضربك انتي شخصيًا .

قاموا قافشين في بعض . . هالار اسود صل ع النبي يا أوساز غسان وسيب  
جهاز الضغط دا عُهدة . . إمسك طفاية الحريق دي مش تبعنا .

\*بمد إيدي ع التليفون اطلب الأمن\* قام قافش عليها وقالي عتعمل  
اييبويه؟!

- مفيش كت هطلبلكوا اتنين كاركديه . . إهدى بقا والنبي والنبي  
\*بصوت هندي\* .

- أه دي عيني انا يا أوساز غسان عيني انا، عين عفاف اهي .

الحناقة دايرة ومحاول اسلك نفسي م الاستقبال شعارف . . وكعادة الأمن في  
كل حناقة \*صلاة العصر وجبت وراحوا كلهم يصلوا التراويح\* .

المهم بعد حبة شتايم على شدم الشعر على كام قفا وكام بونية، فجأة وبدون  
أي مقدمات أوساز غسان بقا هاني شاكر في نفسه وضربه سلك حنية غريب  
كدا أو تقريبًا خاف من سيرة امها وقام قايلي خلص ياعم غير لها عليها خلصناااا  
عازين نروح .

- أغير ايه دي مفتوحة وهحتاج خيط .

هو سمع كلمة خيط من هنا وقام قافش على رقبتها وقالي: تبقى تخيطها  
عند الخياطة بقا اعاهاهها . . وقعد يضحك ويكحُ لحد ما كان هيرجع علينا . .  
راحت عفاف هي كمان ضاحكة! وام سمير العاملة ضاحكة! وظهروا أفراد  
الأمن عشان يشاركوهم الضحك، وواحد كان معدي في الشارع سمع ضحك في  
الاستقبال دخل ضحك ومشى، وانا قومت مغير لها ع الجرح ومسحسح  
معاهم . . هذا وقد عم الضحك أرجاء الاستقبال . . وخدها ومشى! أه يا ولاد  
الهبلّة.

#بضحكي دلوقت اعفاف .

#أمسحي دموعك يلا وروحي مع لباس جوزك .

#طب مين هيقطع وصل بالبيّادين والشاش اللي اتلف دا اجدعان؟!

#أوساز غسان انت ماشي وماقولتليش هعمل ايه؟!





## العناية المركزة

ميس بطّة ..  
رئيسة التمريض هنا ..  
وبيبي فراح بكرا اضهر ..  
وبرحب ببيكم ..



Alm



## زيارة مُفاجئة

نبطشية عناية مُركزة المرة دي ويوم مشهود في تاريخ المستشفى العريقة اللي  
شغال فيها جه النهاردا مرور مفاجئ من الوزارة من بتوع الـ infection  
control . . فنازل الصبح اتخترع السلم بالباطو رايح للكشك اشترى لوليتا .  
بجبها أوي . . فلقيت البت هند مساعدة التمريض طالعة بتجري ع السلم وقامت  
خبطة فيا وموقفاني . كويس اني لقيتك .

– في إيه ابت اهيبيند بتجري كدا ليه؟ !

= في خبر مش حلو .

– لاء مانقوليش ! الواد حمدي بتاع الكشك ماجبليش اللوليتا أناناس؟

= لوليتا إيه ياعم انت ركر معايا . . في دكاترة بتوع مكافحة العدوى دول في

المستشفى والدنيا مقلوبة!

- عندنا في المستشفى إنيفكشن كترول! داحنا ماعندناش غير

إنيفكشن وبندورها على كترول . . إطلعي بسرعة بلغي اصتف التمريض

وخصوصًا ميس بطة تشيل البصل وفطارها الخفيف بتاع كل يوم وتتصرف في

سندوتشات السمين اللي جايهاها وترمي الكبد . وياريت انتي ياهند تشوفيلك

أي درج أدوية تترمي فيه:

- ليه بقا ان شاء الله مالي!

= مالك إيه انتي نسييتي اسمك إيه! "هند فيروسات" . . اختقي يلا . لما

الحق بلغ باقي الناس .

و ثانية كمت متحول لدودة قز ولافف ع المستشفى قسم قسم وغرفة غرفة

ودرج درج ودرج زنجي زنجي .

**\* دخلت ع العمليات \***

- ساحلير ازيكوا معلش قلقت منامكوا . . بس في تفتيش من مكافحة العدوى فياريت تقوموا تعقموا أدواتكوا وبالمرة استحموا ريجتكووا قابلة المكان.

\* الحَضَانَات \*

- سالخير اجماعة معلش في تفتيش مفاجئ شيلوا العيال في حضاناتهم وهاتولي علبة الزبادي دي اكوها .

\* الاستقبال \*

أول ماروحت لقيت خناقة.. سالخير باجماعة..

\* قام واحد صعيدي قافش فيا وشاددني لجوه \*

= أيوة عنثا ايل بجا على ميتين أبوووكوا عشان تيجوا تكشفوا ع الواد.. طب عليا الطلاج لو حصله حاجة لا طلع تببيت اللي خلفكوا.



سألتهم: ألا هو فين بقا المريض؟!

فطلعت إيد وشاورلتي من ع السرير . . أفندم انا موجود .

فتحت ثاني أوضة . . المرة دي مالتش ناس كثير جداً . . مالتش مريض

أصلاً . . بس لقيت الدكتور النايب! كان نايب على نفسه شوية.

نقسي اتقفلت م الغرف خالص فروحت على طول ل ميس عواطف رئيسة

الدور لقتها بتصلي . . ياسالاهم ميس عواطف دي كل ما اطلعها الاقيها ع

السجادة! ألا هي صلاة إيه دي اللي الساعة ١١ الصبح! أكيد بتستخير ربنا

تشتغل النهاردا ولا لاء؟

يلا المهم مارضتش اقطع خشوعها واقولها فسييت علبة الزبادي ع المكتب

جنب إزازه البيتادين لما يطلعوا يظبطوها متلبسة . أنا أصلي بعزها أووي.

كدا مش فاضل غير العناية المركزة . . منطقتي بقا . . يدوب الحق انزل اقتل

ميس بطة الممرضة واتاوي ريشها .

ولحسن حظي لقتهم قدام الباب مع المدير كان يتكلم مع دكتورة منهم اسمها  
نرمين . حاجة كدا اللهم صل ع النبي ولا إعلانات دي تول . . الست كانت ريحة  
الصابون طالعة منها . . أول مادخلنا لقيت واحد منهم قلب كلب بوليسي فجأة  
وفضل يشمش في المكان!

- الله يحرقك بجاز اميس بطة سندوتشات السمين بتاعتك قالبة المكان . .  
يارب ماتكونش رمتهم أنا جعان أوي.

المهم إلى حد ما كانت علامات الرضا باينة عليهم أو القرف مش عارف . .  
بس انبسطوا م العناية وشكل المرضى والعاملات ونضافة المكان لحد ما ظهرت  
ميس بطة وهنا توهجت أكثر ريحة السمين! جاموس بلدي هب علينا . .

راحت قايلهم أهلاً أهلاً أهلاً نورتونا وأنيسوتنا والله!

- ميس بطة . . ميس بطة . . هششش خشى العشة خشى تفضحناش  
نورتونا إيه هُم نسايبك! شوية وتبعني هند تجيب حاجة ساقعة!

سألت د. نرمين المدير:

= وعلى كذا المكان مزود بـ واي فاي؟

قامت ردة ميس بطة بسرعة وقايلها:

= والله بقالنا إسبوعين مكلمين عبده السباك ييجي يشوفلنا حل في

المواسير، بس الحمام اللي ع اليمين شغال!

- ياخوانا حد يطبخها .. ماتاخدوش في بالكم يا جماعة .. الحمام اللي ع

الشمال هو اللي شغال.

الحمد لله خلصوا ونزلوا يعدوا ع الاستقبال لقوا الحج عامل كترول لوحده

خدوا في وشهم ومشبوا.

#أيوة كذا احج اظروفهم عالي مجنجرتك دي يمكن مايحوش تاني.

#هيبيند بت اهيبيند اطلعي من علبة الفولتارين خلاص مشبوا.

#خلاص ياميس بطة تقدرى تروحي تطلعي الحاليل من التلاجة وتحطي


البامية بتاعتك.

#وماتنيسش تكلمي مهندس الكمبيوتر يجي يشوف الحنفيات اللي بتنقط.









## الحقوني ابني جاله داء النوم

وفي عز منا قاعد في البيت بتفرج على فيلم "إسكندرية ليه كدا" لأستاذ يوسف شاهين ومش فاهمه كالعادة تتصل بيا زميلة فاضلة اشيل مكانها نبطشية استقبال النهاردا لعذر قهري . عندها غسيل وماغسلتش بقالها إسبوعين وشكلها هتطلق، قولت لاء إلا التفكك الأسري طيب مفيش مشكلة دانا خدوم دانا خدوم جداً \*بصوت حلمي في إكس لاريج\* ووصتها ماتضيعش الشرابات في الغسيل زي امي . . المهم لبست وانطلقت للمستشفى العريقة.

قاعد في نبطشية هادئة بلعب صب واي واخسر، بلعب واخسر، بلعب واخسر واسكر . . لقيت فجأة ست تخينة شايلة ابتها بعد محاولات مُستمِية فإنها تعدي م الباب . . ياولية اشفطي كرشك دا وبعدين خشي انتي الأول وسلّكي ابنك الواد هيتحشر في مفصلة الباب يحزيتك.

= إلقوننااااي ياناس الحقني ياخويا .

- حصل إيه ياختي اقعددي ارتاحي .

- الواد ابني ياخويا . . الواد ابني .

= إيه كتيه؟

- لاء أكلته أيس كريم ومن وقتها وهو نايم .

- إيه دا ازاااي! هو متعود ينام كدا على طول؟! يعني النوم دا بيجيله  
إمتى؟!

\* بص لقيت الواد نايم عادي ويلتقط أنفاسه بشكل طبيعي لاء ويتاوب

كمان! لدرجة ان دماغني نقلت جنبه \*

- ياستي ما الواد كويس اهو نايم زي باقية الخلق .

= آمال ما يصحاش ليه؟!





## الحالة بقت زالفل

نزلت مرة في مستشفى نضيقة جدًا في مصر الجديدة.. المستشفى دي كان فيها سيستم حلو أوي اسمه أكواد الطواريء..

ده عبارة عن أكواد ب ألوان.. لما تكون في أي حالة طارئة في المستشفى السويتش ينطق في المايك باسم الكود يستدعي اللي في المستشفى أو الفريق الطبي حسب نوع الحالة.

وكل اصنف وليه كوده.. يعني لو حالة محتاجة عناية مُركزة يقول:

attention please.. code blue.. code blue

فينزلوا بسرعة اللي في العناية المركزة..

لو في خناقة يقول code green يستدعي وقتها أفراد الأمن..

code red دكاترة المراحة . .

code yellow بينزل النسا والتوليد . .

وهكذا . . ولأزم كل اللي في المستشفى يكونوا حافظين الأكواد ومستعدين  
دائماً . .

شغل بلاد بره يعني . .

فانا ماكتش لسا حفظت كل كود ببدل على إيه . . فكل ما اسمع الندا انزل  
بسرعة وخلاص . . مرة الاقي حالة ولادة فجوزها يمك فيا فاكرني دكتور النسا  
والتوليد ونازلهم متأخر!

مرة خناقة فانزل اتضرب مع بتوع الأمن واطلع . .

ومرة حالة عظام . . بس دا بيبقى مكسور مايقدرش يقوم يضربني فاللي معاه  
هم بقا اللي بيضربوني . .



المهم وقت ما كانت في حالة محتاجة arrest<sup>(١)</sup> كنت في الحمام محسور...  
ونفس الوقت كانت في خناقة... فالسويتش نده على كود العناية المركزة والأمن مع  
بعض فنزلنا بسرعة لقيت خناقة قدام الاستقبال قولت استنى شوية ع السلم لما  
الأمن يطلع... وبص كدا الاقيلك في الخناقة واحد حمدي الوزير في نفسه كدا  
كان شبهواوي، يعني المرة دي مش هيبقى ضرب بس... أول ما لحنا الأمن طالع  
نزلنا بسرعة فطلعت الخناقة تبع الحالة اللي جوه أصلاً... فداخلين لقيت واحد  
مسك فيا وهيرجع في ودني وقالي: انتوا فييين؟! انتوا فييين؟! قولتله: معاش  
والله اتزقت وكنت في الحمام عادي يعني مانت مابتزق محدش بيقولك حاجة!

= وكما ان قاعدلي في الحمام! \* طراناخ \*

- آاه يا عيني يامًا .

\* وبعد شغل لقراة نص ساعة على الحالة \*

---

<sup>١</sup> - arrest : توقف عضلة القلب

وستر ربنا انها كانت غيبوبة سكر وفاقت معنا الحمد لله.. فخرجت  
لقيتهم بيتأسفوا وحقكوا علينا والأوساز حمدي الوزير داخل عايز يبوسني..  
- لاء من غير بوس يا أوساز حمدي من غير بوس انت بالذات.





أبوس إيدك كفاية عيّنات ..  
بطنى قلبت .. !!



## أبوس إيدك كفاية عينات

يوم آخر بالمستشفى حيث نبطشية استقبال طوارئ هادئة كنا في رمضان  
والجو صيام والناس مخمودة في بيوتها . . قاعد بلعب أتوبيس كومبليه ومحتاس في  
حرف الدال . . فجأة واحد دخل عليا دخلة رفاعي الدسوقي وماسك عيل  
صغير تخين في إيده وقام حاطط شنطة بلاستيك ع المكتب ومطلع منها علبة . .

- إيه ده! لسه بدري ياعم ع الفطار بتوزعوا بلح من دلوقت؟

= لاء ده مش بلح.

- أه يبقى عرق سوس . . لاء ماليش فيه.

= عرق سوس إيه لاء.

- بس ماتقولش! مشمشية . . مجبها أوي.

= لاء العلبة دي فيها ..... .

- إيه فيل اعاهاهها بيس .. .

= لاء هوريك .. . وقام فتحها لقيت ترجيع .

- إيه ده ياعم ! الله يقلب بطنك .

= ده اللي برجعه م الصبح .. بص شمه كدا .

- بس اعم ابعده اشم إيه ! مش كفاية ريحة ابنك اللي انا مستحملها من

ساعة ما دخلتوا .. انت يالا افقل جبهة المدفعية دي انت كمان وروح

خرج مشاعرك في الحمام .. .

ولا تكونش انت اللي عايز تخرجها ؟ !

- قالي: بص ده دم صح ؟ دم ؟ انا شاكك ليكون عندي بلهارسيا .

= والله انا شاكك تكون انت اللي عند البلهارسيا .. ودم إيه دي مية

مخلل .

- خد روح اصرف الروشة دي م الصيدلية واعمل سونار بطن وتعالى.

= طب بقولك الواد ابني بيسهل برضو.. بس إسهال غريب، هات يالا  
العلبة بتاعتك.. أهوبص.

= ضكطور! مالك.. اذضكطور؟! إلحقونا اجدعنا ان الضكطور  
يبرجع.. طب إلحق بسرعة خد عينة بسررررعة.


#سمعليقوا انا جالي برد وجبتلك عينة من اللي بنفوه.

#ضكطور انا بعمل لامؤاخذة ريح كثير وجبتلك عينة \*يطلع بالونة  
يطيرها\*.

#ضكطور انا قتلت مراتي وجبتلك عينة \*لحم بقري طازج\*.



إزالة مائه لحر الصيف وساعات بملها تهر هندی





## دكتورة / شاهيناز

يوم آخر من أيام رمضان الطويلة قومت لبست وانطلقت للمستشفى العريقة اللي  
شغال فيها، حيث نبطشية عناية مُركزة.. أول ما وصلت ولسه داخل لقيت  
مشهد "دقوا الشماسي.. دقوا الشماسي ع البلاچ دقوا الشماسي" .. العناية  
غرقانة ميا! وميس بطة واقفة بتوجه العاملات اللي ماسكين مساحات  
ومشمرين.

- اम्म يافتاح ياعليم يارزاق ياكريم ع الصبح.. إيه ياميس بطة مصيف بلطيم  
اللي اتوا فيه دا؟!

قالتلي: أصل الماسورة اللي في الحمام ضربت ومغرة الدنيا وكلمنا عبده  
السيالك.



وحدت ربنا ان مكش فيه مرضى وإلا كان اتكّتب فينا مُذكرة زافل لعدم وجود infection control اللي هي مش موجودة أصلاً دا ميس بطة بتسيب أجهزة الوريد متعلقة من غير غطا ويمكن تاخذها فومين وتركبها تاني.. نشاط اقتصادي.

- أهلاً يادوك اتفضلي اتفضلي.. وخذتها لفة في العناية المركزة.. دي ياستي بقا السرير اللي بتنام عليها المرضى.. ودا....

وسعي ريشك دا كدا اميس بطة دا بقا كراش الأمبولات.. أما دي بقا التلاجة.. طبعاً دي مفروض تلاجة موفرها إدارة المستشفى نخط فيها أكياس دم، حُقن كلكسان، البومين بشري، والأدوية عموماً اللي بتحتاج تُحفظ في درجة حرارة باردة، ولكن ميس بطة ليها رأي تاني فمحولها زي ما انتي شايقة وتقريباً بتخط أكياس الدم في الدولااب.. لقينا فجأة ميس بطة في قفانا وقامت شهقة ولا شهقة ملوخية مطاعم ام حسن.

- إيه يا ميس بطة خضيتنا إيه اللي حصل؟!

أنا فكرت بقا هتضايق ان اكتشفنا النص لمونة اللي ف الباب وخلاص  
هتتحول للتحقيق.. لقتها بتقولي مسلسل عادة عبرازق بدأ والعناية فاضية بقا  
النهدا فرصة انزل اشوفه عند بتوع الأشعة.

- خووودي هنا هي عشان اسمها أشعة تليفزيونية يبقى بتجيب عادة  
عبرازق! فضحتنا قدام د. شاهيناز اسكتي.. الأشعة اللي تحت  
سونار بطن وحوض ونيلي كريم بس  
. وسعي كدا اما الحق المسلسل من أوله.

#ميس بطة في عملية زرع نخاع تحت اقطفلنا اتين م اللي زرعاهم ونزليهم  
العمليات احيات أبوكي.

#ميس بطة في عملية قلب مفتوح مش عارفين يفتلوه خيطك وإبرتك وقفلي  
معانا ياست الكل \* بصوت الشيف شربيني \*.

#ميس بطة الرسو خالص منهم في وحدة غسيل الكلى بيسألوا لو فايز منك  
حبة.

#ميس بطة قلم وورقة عازين نعمل رسم قلب.

#ميس بطة انا كتبت فيكي مُذكرة تحوّلك للتحقيق وعارفة ليه طبعًا ! عاز

اعرف علبة الجبنة اللي كانت في باب التلاجة راحت فين ؟ !



خَطِ اَمَلَكْ رَا تَدْفَعْلِي مَكَانَه --  
وَرَكِينِ فَرْخَه وَجَاتَوَهَايَه يَا لَلا!!! --!



## عُقبال عندكم

قاعد في استقبال الطوارئ ببني بروت بخافض اللسان ولسه هعمل أنتريه بالشاش فدخل عليها عريس وعروسة! أه والله، ودا بصراحة اللي كان ناقص في مستشفى موجة كوميدي اللي شغال فيها دي.. عريس عادي جداً ضارب بدله وعروسة عادية جداً ضاربة فستانها وضاربة امه.. وجاي وراهم المعازيم.. وطيت على ودن واحد منهم استقهم يعني قالي ان حصلت خناقة وقت البوفيه بين ام العريس وعمة العروسة فحدفتها بطبق فتحت دماغها.

- طب والبوفيه سليم؟ بعدين مش عارف بصراحة إيه اللي جاب العريس ورا امه في ليلة زي دي.. المهم ان قاعة الفرح انتقلت لبث مباشر م الاستقبال، ماكش فاضل غير اني ألف ع المعازيم أوزع محاليل.

\* الدنيا بقت خليطة وكه بيتكلم في نفس واحد ومُشادات أكثر م اللي بتحصل في برنامج الأوساز وائل الإبراشي \*.. شوية ولقيت لميس الحديدي

دخلة علينا . واحدة كانت شبهها أووي والشرار يطلق من عينها وبدون أي  
مقدمات قامت جاية ام العريس من شعرها .

- هاااا اسود ياخواناااا صلوا ع النبي دي لميس ودخلت بينكوا .

وسط الزينة والزம்பيلة لقيت العريس قام موطي على ودني وقال: بقولك انا  
عاز اخووش... .

- نعم ياخويا تحش فين! لاء العيادات مقفولة والحضانات العيال مولودين  
قالعين لوحدهم فمش ناقصة قدامهم، والعمليات نايمين، والحمامات أوساز  
حمدان المدير الإداري رايح جاي عليها بالليل، خليكوا لما تروحوا ولا  
تجيش تحش عليا؟

= أنت فهمت إيه لاء انا بسأل عاز أخش الحمام.

- ودا وقته! خيلنا نشوف بس دماغ امك دي، ولا شكك مش قادر  
وهتقط علينا، روح روح الحمام كدا عند العيادات.. . بقولك ايه سيب  
العروسة هنا .

\* أم العريس رافضة تخيط الجرح والعروسة بتعيط! وامها على نغمة واحدة  
. كات جوازة مهبية . كات جوازة منيلة بنيلة وديني يا علاء لاوريك \* ..



أحييه العريس المزنوق طلع عيلااء . أنا قولت باين عليه آثار سليمان عيد .  
قامت ردة عليها امه المفتوح دماغها: توري مين يابنت الجزمة، كان نسب  
اغبر ماشي وديني لتفوضها سيرة.

- بس احجة بقا وركزي في دماغك دي . . هو أوساز عيلااء هرب في  
مجاري المستشفى ولا إيه؟

هوب واشتعلت الحناقة ثاني وولع الاستقبال وانا كل دا سايبهم يضربوا في  
بعض ومش شاغل بالي غير حاجتين! ياترى أوساز عيلااء هو وشاحن الموبايل  
راحوا فين؟! فخاذك كدا يا مدام لميس انتي وأوساز ماجد المصري اللي جنبك  
دا . . الموبايل ٥٪ ياكفررة . .

الحناقة دايرة والأمن بيصلوا العشا في الحرم المكّي كالعادة، وانا لسه بدور على  
الموبايل تحت الشيزلونجات . .

- إيه دا! هي الدنيا مالها هديت فجأة كدا إيه؟! لتكون ام العريس  
انقتلت؟ لا أطلع اشوف بقا\* . .

طلعت لقيت شخصية مهمة كلهم اتخرسوا لما شافوه . . تقريباً كبير العزايزة،  
زعق في الكل وأول ماسأل عن العريس طلع شد السيْفون وجه جري! إستنوا ام

العريس خيطة الجرح وخدمهم كلهم وقالهم بكل عقل ورزانة وهدوء وسكينة  
وعماد أديب: ميصحشكدا.. إيه دا! بتتخاقوا في قلب المستشفى! يلا لينا  
بيوت تتخاق فيها يلا.

- انت كدا حلتها يعني احج؟

ويدوب نزلوا وقامت عمة العروسة مسكة في رقبة ام العريس ثاني وتقريباً  
فتحلتها دماغها.. دا إيه الولية دي اعوذ بالله \* بصوت اللمي \*.

#عيبلاا ولا يا عيبلاا.. أمك دماغها اتفتحت ثاني يالا ابعتلي العروسة  
بسرررة.

#خلاص لقيت الشاحن تحت باط أوساز ماجد المصري.

#ياخوانا محدش حاسب ع الخيط، طب استنوا جاي معاكوا، أي حاجة م  
البوفيه انا جعان والنبي.





قنیه زایه یا عم انت -- رایہ الی حصل ؟!

معلش بقى .. نسیت اقولو کو --  
ان الأسان سور ده بالذات --  
شعال بحجارة -- !!



Algh

## أسانسوور !

متعود انا انزل اشترى حاجات من الكشك اللي قدام المستشفى و مرة كنت نازل اشترى مولتوبالفراولة فلقيت واحدة رجاء الجداوي في نفسها كدا وشابكة في دراعها الأوساز سامي العدل .. واحد شبهو أوي .. وواقفة بتزقق لبتاع الأمن .. مشاء الله كان عليها حنجرة لدرجة اني فكرت الصوت دا خارج من أوساز سامي نفسه.

= فين الزفت عامل الأسانسور يشغل المخروب دا .

قالها: معلش هو في الحمام وجاي عطول.

فقطعت كلامهم وقولتها: في حاجة يا ماما ؟!

قالتلي: أنا مش ماما أنا الدكتور سونيا، فين الزفت يشغلي الأسانسوور دا

\* كانت بتقولها كدا بالفرنساوي \* ، وقامت باصة لبتاع الأمن وقالتله: أنا  
هجيبلكوا كللكوا جزا ياشوية بهاهيم!  
- اممم طيب.

= خود هنا انت كمان هو ايه اللي طيب وواخدي في وشك كدا وماشي!  
انفضل ساعدنا.

- أنا اساعدكوا! طب والله فكرة.. ثواني.  
فاحنا بيبقى معانا نُسخ من المفتاح للطوارئ روح شغلت الأسانسور  
واستنتهم يطلعوا وقومت معلقه بيهم وسايه وماشي.  
#يلا بقا معدتش تفرق سينا من سونيا.

#مفيش حاجة تفرقنا عن بعض أبداً اعووومري \*بتبص للأوساز سامي\*.









## ماما حلوة

في نبطشية يسودها الهدوء والسكينة ومجات الشاي بلبن، قاعدين في أمان  
الله في العناية المركزة لا نسمع سوى أنفاس المرضى وأجهزة المونитор وصوت طرقة  
صواعع ام ياسر العاملة، إذ بواحد بيدرك الباب . افتحوووووا افتحوووووا  
أووووماي بتموت تحت افتحووووا .

نزلنا جري ع الاستقبال قولنا شكلها حالة arrest . . والحالات دي بنتعاون  
وقتها مع بتوع الاستقبال فيها . . أول مانزلنا لقينا ناس كثير جداً ! وست واقفة  
مابتقولش حاجة غير ياخراي وتصوت . . خراي وتصوت . . كانت عاملة  
موسيقى تصويرية بنت جزمة للمشهد . . حاولنا نزاحم وندخل لقينا ست ممددة  
ع الشيزلونج وأمة لا إله إلا الله ملمومين عليها . اللي هو لو في حبة هوا في المكان  
هم سحبوهم خلاص . . لسه هنتيس الضغط قام ابنها جاي بكل أفورة أوساز

أحمد عبيز في المال والبنون وقال: هاء أوماء اي عاملة إيه؟ عاملة إيبنيه  
أوماء اى مش عتموت لاء مش عتمووت وعباس الضو يقول لاه.

- يا عم و دن اوماااي انا ! اهدى دى لو هتموت فهتموت بصوتك دا .

وقام زاقنا وقعد يفرهد فيها اصحى يامّا ااصحا ااااااي.

- هاءااااا اسود يابني سيب امك عايزين نشغل.

الحمد لله أقنعوه يهدى بس فشلوا يقنعوا الست اللي بتصوت وياخرايبي  
تسكت. . لفينا كف الضغط وهنقيس ونخلل سكر وإذ بواحد شبه أشروف في  
مسلسل الكبير أوي جه وزق الكل تاني وقرب من ابنها وبدأ يتعامل معاها على إنه  
إزازة راني خوخ وفضل يرج فيه ويقول: أمك فيسين يا حسين امك فيسين؟  
أه دى العيلة كلها أوفر بقا.

- أهی یاحج اهی تعالی اتفضل فردها شویة واحنا هنستأذنکوا نطلع بقا .

قام قابلنا:



حرا إيه يا ولاد الكاااالب الناس شعارقة تشوف شغلها . . حقتك عليا يابني انا  
أصلي كنت بلغت بورشام منوم ارتاح منهم ومن دوشتهم شوية بس صوتهم اللي  
فوقني . . يلاع البيت يا عجل منك ليه انا كويسة ساموعليقوا تعبناكو يا جماعة  
ساموعلقوا .

**\* وشالوها ومشىوا \***

#منوم احبة! طب الاقيش معاكي قرصين ليا؟ أو سم فيران أي حاجة.

#خوودى احجة مشيتى بجهاز الضغط فى إيدك! إرجع بامك يالا.

#طب مبین هاغیر للعیل الصغیر دا اجدعان؟!

\*بعد ما مشيوا عم محمد موظف الأمن طلع فارد عضلاته\*..

= كمت سامع دوشة في الاستقبال كان فيه حاجة ولا إيبية؟!

- لاء ابدًا اعم محمد تشغلش بالك انت تعالى اقعد اعقلك محلول الملح اللي تحبه.







# مستشفى الدمرداش .. هنحط عليك وتقول عاش

في يوم كان عندي إترفيو في مستشفى الدمرداش مع استشاري الجراحة ..  
وبعد ما كانوا بيلقنوني الشهادة في المتروم الحر اللي كان هيفطسني جوه شاء القدر  
النجاة .. أول ما وصلت المستشفى لقيت كل أفراد الأمن بيتكلموا في الموبايلات!  
وكل ما اسأل واحد ..

- لو سمحت فين مبنى الجراحة؟

يشاورلي بإيده .. لاء مش ع المبنى، ع اللي جنبه عشان اسأله لأن هو مش  
فاضي! أروح اسأل اللي جنبه يشاورلي اسأل اللي جنبه .. وفضل كل واحد  
ذنبه ع اللي جنبه كدا لحد ما زهقت وقولتهم يلا عنبوكوا .. ودخلت انا

استكشف بنفسى .. وطول ما انا ماشى مشاء الله عاملات المستشفى كلهم  
على وشهم مصطفى كامل ع الصبح! محدش طايق حد ومدورين اسطوانة ربح  
وزعيق على مين تمسح السلام! فروحت اسأل واحدة منهم قولتلها:

- لو سمحتي كنت عايز .....

قالتي معرفش.

شوية ولقتني قدام مكتب التمريض وكعادة المرضات المصريات يمتازوا  
بالرشاقة واللياقة .. مركز شباب السمنة قاعدين بيغفطروا ..

- سامعليتوا تعالوا كلوا ..

ماردوش.

- لو سمحتوا كنت عايز مكتب د. رؤوف.

فواحدة خرجت عن صمتها وقالتي:

= بص روح ل ميس تفاحة هتدخلك ليه.

- طب وميس تفاحة دي الاقيها في أني شجرة؟



= ثاني مكتب ع الشمال . . هااااا ارك اسود يا نوجة انتي لسه لحد دلوقت  
ماصبتيش الشاي!

فردت نوجة عليها: والله سوهي عليا يا ميس سوسن انا آسفة.

فميس سوسن بصتلها حنة بصة ما بصتهاش لبنتها لما جابت مجموع وحش في  
ثانوي.

المهم سييت نوجة تصب الشاي وطلعت ادور على ميس تفاحة اشوفها في  
أنهي طبق فاكهة في أم المستشفى الغربية دي.

\* أخير ااااا لقتها . . كانت على سجادة الصلاة \*

= السلام عليكم ورحمة الله . . السلام عليكم ورحمة الله.

- أكيد دي صلاة الجنازة على روح البت نوجة عشان ماصبتش الشاي.

- سماعليقوا حررتك ميس تفاحة؟

فلقتها سوسن شعيب في نفسها كدا وقالتي: أيوة يا بني اتفضل.

\* ومن خبرتي اقدر اقولك طالما ست قالتلك يا بني اعرف انها ست طيبة

وهتساعدك \*

- كنت بسأل على مكتب د. رؤوف عندي ميعاد معاه بخصوص شغل.

= طيب اتفضل بس افطر معايا ونطلعوا سوا.

- ياسلام كمان فطار! لاء حقيقي تفاحة والله.

\* ولسه بدي ابيدي على سندوتش الفول لقيت البت نوجة جاية بتجري \*

= إلحقي ياميس تفتيش من الوزارة. . تفتيش من الوزارة.

فجأة ميس تفاحة اتحولت وقامت ناتشة مني السندوتش وقاللي: انت لسه

هتقعد. ورمت السندوتشات والبصل والخيار ونوجة في درج الأدوية.

#الله يحرقك انوجة ماكملتش السندوتش.

#ياتري ميس سوسن لحقت تشرب الشاي ولا قفشوها.

#ماحدث قالي برضو هو دكتور رؤوف فين.

#نوووجة. . بت انوووجة اطلعي صبي الشاي خلاص مشيوا.







## رحلة مدرسية

نبطشية هادئة في العناية المركزة - نزلت للواد حمدي بتاع الكشك اللي قدام  
المستشفى بعد ما عرفت انه جابلي اللوليتا أنا ناس اللي مجبها .

بص كدا لقيت عيال كتير لابسين يونيفورم مدرسة ومنتشرين في المستشفى !  
قولت إيه دا هو في تطعيمات النهاردا ولا إيه ؟ !

ولا تكونش ميس بطة الممرضة مطلعة رحلة . أه ماهي عملة جمعيات وبتبيع  
البسة وفانلات داخلية وفراخ وساعات بتنزل فرد أمن بالليل عادي  
ومشاء الله عليها مدوراها نشاط اجتماعي في المستشفى كلها . . المهم سألت  
عم محمد بتاع الأمن بعد ما اعتذرتله اني قلقت منامه:

- هو في إيه ياعم محمد ؟ إيه العيال دي كلها !

= قالني: المدرسة اللي جنبنا مطلعين رحلة وقالوا يعدوا يفرجوا العيال ع  
المستشفى .

- مستشفى إيه اللي العيال جاية تتفرج عليها هو متحف الشمع! ماعلينا

ربنا يوفقهم... \* ناديت على عيل م اللي كانوا واقفين \*.

- خود يالا تعالى ورييني معاك سندوتشات إيه؟

وقومت واخذ منه سندوتش حلاوة بالقشطة قسمته مع عم محمد ونزلت.

\* جبت اللوليتا وطلعت \*

لقيتهم واقفين قدام الاستقبال لابسين كمادات! والمِستر منشكح أوي  
وبيشرحلهم أكنه قدام معبد الكرنك.

= ودا بقا يا ولاد اسمه استقبال الطوارئ واللي قاعد بره دا شكله

الدكتور... هنروح نسأله هو قاعد كدا ليه؟!

. سماعليقوا اداكتور... .

يدوب الراجل ماكمش كلامه ولقينا واحد طول بعرض بارترفاع دماغه

مفتوحة وجايب دم من كل ناحية خارج م الاستقبال وقام زاقق المِستر

۱۰. یا اخی او عی کدا انت کمان.

الواد وشه شبه ضرفة الدولاب وخارج بطبقة صوت ما أثرتش خالص في نوم  
عم محمد ! وطايح في الكل وعمال يزعل ويقول والله منا مخيظها .. وبيزق في امه  
- اوعي يا مّا عطلاق ما مخيظهااااااهااااااعععععع الا اما اطلع تبيت أم  
الواد نلاااااطة.

فالعيال سمعت صوته خافت ونزلت جري ع السلم

- وانا قومت شايل المستر وواخدين في وشنا وورا هم على طول.

- عرفتم یا ماستر دلوقت الدكتور کان قاعد بره لیه!

= عرفت ياعم عرفت .. اجررري.

واحنًا نازلين قابلنا المدير طالع يقابل الرحلة بذات نفسه لقي الواد بيزعق  
افتكر ان صلاة الظهر فاتته لف ورجع ثاني.

المهم المستر سألني إيه مناطق أثرية تاني في المستشفى ممكن يخلي الولاد  
تشوفها.. اقترحته الحمامات.. الأوساز رؤوف مدير الحسابات والصرف  
الصحي هنا عامل فيها شغل هایل هتجيبك.

خلص وشد السيْفون وابقى عدي عليا في العناية المركزة فيه عندنا ميس بطة  
العيال هينبسطوا بيها أوي.

#ميس بطة عايزك تفقي ع الباب أي عيل معاه سندوتسات احجزها منه  
ودخله.

#وانتي يا ام ياسر خُدي رسوم دخول جنيه بدل عدوى \*احنا اللي هنتعدي  
العيال شكلها ما استحمش بقالها كثر\*.

#وطلعيلي اللوليتا م التلاجة.

#وانت يا عم محمد.. لاء انا اسف كمل نوم انت علوضعك.









## ضكطور إصلاهم

في يوم يسوده الهدوء فعلاً نازل من ع السلم اشترى مولتو فراولة الجديد لقيت ست  
كبيرة وجوزها واثنين كمال أجسام كدا طول بعرض بارترفاع واقفين معاهم ..  
فالست أول ما لحتني شاورت عليا وبتقوول:

- أهووو يا جيج هو ده ..

قومت راجع خطوة كدا لورا .. فراحت قابلة لولادها:

- أهوو هاتوووه ..

قولت هااا اسود دانا ما عملتش أي مصيبة النهارده وبدأت افكر في عم

جمال بتاع الأمن جدًّا يلحق يلقي الشهادة واناكدت من حفظه للصلاة على  
المتوفي ..

أول ما جُم عليا لقتها بتقولهم:

- أهو ده بقا ضا كطور إصلام اللي خيط دماغ ابنك خياطة معلم تصللم  
إبيدك.

فضلوا يشكروني والحب طبطب عليا واداني سيجارة! خدتها ومشيت ..  
يا جماعة مالوش لزمة والله ده واجبي.





ما أنت هاتخس الحمام يعني هاتخس...!!



## مين اللي كل الجنة؟!

نبطشية هادئة كالعادة! من نبطشيات استقبال الطوارئ بمستشفى المعادي  
قاعد مجاول اشوف أكياس الكوفي ميكس اللي بتشربها ليلى الممرضة شايلها في  
أني علبة بيتادين . . وبدون أي مقدمات لقيت ست تحينة وعيلين في ديلها واحد  
مسكاه والتاني محشور تحت باطها وداخله بيهم عليا . . أنا شوقتهم واتطمنت  
على مخزون مصرم اللحم البقري . . طالعة بتهيج من السلم هي وعياها بدهونهم  
وإفرازاتها الدهنية.

= سالخير ياخويا احيات النبي عاوزه اعمل سونار .

- لمين فيكوا؟!

= ليا ع البطن والحوض .

- ممم بصي بصراحة انا مقدر طلوعك للسلم دور واحد بس يؤسفني  
اقولك ان انتي هنا مش في قسم الأشعة.

فراحت بصالي بـ "صدمة عبّحليم حافظ في فيلم الخطايا لما أوساز عماد  
حمدي قاله انت مش ابني" وقامت شاهقة وقايلالي:

= يادي النصيبية السوداء . . أومال انا فين؟!

- في استقبال الطوارئ . . قسم الأشعة تحت انزلي تحت.

= يوووه طب بقولك ايه خود قرب اما اقولك . . ماتكلمه يطلعلني هنا  
بالجهاز وانا هراضيك برضو!

- تراضيني! ويطلعلك فين ياولية هو هيشطبك مطبخ! انزلي اخلصي.

= طب يا خويااا بورراحة . . ممم طب بقولك ايه طالما طلعلنا وطلعلنا

بقا . . وراحت باصة لابنها عجل نبر ٢ اللي كان خاق سندوتش

الجبنة في إيده بيعذبه مش بياكله . . وقامت زقاه عليا وقايلالي: خد



اكشفلي ع الواد ده . . قايم نايم مايباكلش غير جنبه . . ولامؤاخذه برازه

كدا غريب!

- غريب! غريب ازاي يعني؟! وانتي ايه بيخليكي تبصي فيه أصلاً؟!

= مم مش عارفة هات أي بتاعة كدا اخليه يجييلك عينة فيها .

= الله يقلب بطنك انت وابنك ع الصبح . . طيب طيب لما تعملني الأشعة

بس وتيجي .

= والله أبداً لازم تشوفلي الواد، ده قارفني كل يوم بـ ٢ جنيه جنبه انا

هجيبله منين . . خود ياواد كوباية م الضوكتور وروح خش الحمام هاتله فيها عينة .

قام الواد كبرت في دماغه وصمم والله ما هو داخل . . قامت هي كمان مش

ساکة وراحت ضارباه على بؤه وبعلو صوتها قايلاله: والله لتُخس \*مشوها

تُخس \* . . قام الواد معيط: والله منا داخل هاه بس . . قامت نازلة ضرب فيه

والواد يعيط شوية ويقطم السندوتش شوية . . وفضلنا كدا بتاع ربع ساعة لحد

منا زهقت ونزلت تلطيش معاها في الواد .. أنا بقا الفضول قتلني وعاوز اعرف  
البي بي بتاعك ده فيه إيه ! والله لتخش .. وبدأنا نخرجهم ع الحمام زي محمود  
المليجي في فيلم الأرض.

\* بتقف كلنا قدام الحمام في انتظار حمادة .. ها يا حمادة نزلت حاجة ؟ !

ليساااااااااااا .. خلاااااااااااا ؟ ليساااااااااااا ؟ جبننااااااااااا ..

بتطلع العينة .. وبتنزل حطة لمدير المستشفى يشوف جبنة حمادة ويفرج  
السكرتارية وأوساز رؤوف مدير الحسابات والصرف الصحي بالمرة ..  
أمه بتنزل تعمل سونار بتطلع هي نفسها اللي بالعة برميل الجبنة \* .

#محب اشارك جمهوري كل لحظاتي المقرفة.







## مشروع النهضة

نظراً لحبي للمستشفى العريقة التي شغال فيها أخيراً قررت اواجه وما اسكتش بقا وقولت كهاااية كدا.. كهاااية.. ونزلت لمدير المستشفى حاملاً إليه بعض المطالب الفئوية ومشروعى للنهوض بالمستشفى ومُذكرة في ميس بطة الممرضة مرفق بطلب استغاثة.

- سامعليقوا اذكور والنبي مانت قايم هو انا غريب!  
\*بصلي من تحت نصارته\*: خير يا عزت.. عايزايه؟! ماتجيليش غير في مصيبة.

- ليه كدا بس.. بقا عشان لما قسم الأشعة كان هيولع الشهر اللي فات أول حد جه بلغك ع الصبح كنت انا.. ولا تكونشي قصدك لما حصل تفتيش مفاجئ من الوزارة.. أه يبقا لما ماسورة الصرف ضربت في الشارع قدام المستشفى.. ولا لما....

= بس بس خلصني اعزت عايز ايه؟!

- مفيش كنت جاي اعرض على حررتك خططي في تطوير المستشفى ..  
نحوووش في الموضوع على طول نحووش في الموضوع \*بصوت طلعت  
زكريا\* ..

أولاً المطبخ .. لازم تبصوله بنظرة ثانية شوية مش معقول تصرفولنا البروتين في  
أجازة الحلاقين .. يوم الاثنين بس! إيه الفكرة من كذا مش فاهمكوا!

ثانياً العمليات .. صرف إزازة ديتول وصابونة لكل الفريق الطبي اللي فيها ..  
حررتك تفتح الباب تحسوهم كانوا ضاربين رنجة .. الناس دي بتعقم أدواتها  
بكيس إريل سعادتك.

ثالثاً: الحضانات .. نوئد كل طفل هينزل .. ودي هتكون خدمة مش  
هينسأهالنا أهاليهم ولا العيال لما يكبروا .. انت متخيل طفل ينزل يلاقى نفسه في  
مصر!

رابعاً: الأدوار .. تعيين فرد أمن بعد اجتيازه لاختبار القدرة على عدم النوم  
لمدة ساعة كاملة وده عشان يصحي النايب في الدور يتابع الحالات لأنه طول  
الوقت نايب على نفسه خالص، ويُفضل شرط تعيين الأمن يكون مسيحي .. أه  
زmqقولك كذا مش معقول كل خناقة تحصل في الاستقبال كلهم يفتكروا ان العصر  
فاتهم .. نفس فرد الأمن ده يقتل "ميس عواطف الله أكبر" اللي كل ماتطلعها

ماتلاقهاش غير بتصلي استخارة إذا كانت تشتغل النهارده ولا لاء".

خامساً: العناية المركزة.. ودي ياريت نصرف مكافأة لكل فريقها الطبي،  
ماعدنا ميس بطة الممرضة نصرفها هي شخصياً م المكان.

سادساً والأهم: الحمامات.. ممنوع دخول أي عيل صغير اسمه "مودي"،  
وبنه على أوساز رؤوف ينبه ع الموظفين في شؤون العاملين كفاية محشي بقا  
حماماتنا مش ناقصة المواسير خلاص طفحت.

أخيراً الاستقبال.. ياريت ده يولع بفعل فاعل.. وانا لقيت حد أمين يبقى  
فاعل عم محمد بتاع الأمن واهو أخيراً هنعرفله دور في المستشفى..

- هااا إيه رأيك؟!

= خود يا عزت امسك سقسق.. قولتلي شايك كام معلقة؟!

- زيادة بس لو هتخط لبن خليه أكثر م الشاي.


= تمام.

- وعلى كذا بكام كيلو الفايش دلوقت اذكور؟!

= مش غالي بس انا بجيبه من فرنة فاتحة جديد.

- أها لا باين عليه.. تسلم إيدك.







## الوفد وصل

"بجانب شغلي بمستشفى المعادي فانا بشتغل بمستشفى ٥٧٣٥٧ وهي الحقيقة حالة خاصة جداً فصعب يحصل فيها مواقف كوميديا كثير فدي كانت حاجة عابرة".

من كام يوم واحنا عارفين ان جاية زيارة للمستشفى من وفد دكاترة نفسيين من دولة الدنمارك الشقيقة في مُستهل جولتهم لمستشفيات السرطان بالشرق الأوسط لتحضير رسالات الماچستير بتاعتهم في سيكولوجية الطفل المريض بالسرطان وكيفية التعامل معاه.. المهم د. شريف أبو النجا مدير المستشفى اجتمع بينا واختار جروب يروح المطار لاستقبالهم كنوع من البرتوكول وكدا..

إشطة بقا دنمارك ومزز وأيتا هنريك جوتبرج كثير الفترة الجاية.. لحد هنا

زافل. . شوية ولصدقة كونية ما يوصل فاكس من الوفد الصومالي امبارح بيعلن  
عن وصوله في نفس اليوم. . يقوم د. شريف يجتمع بينا تاني ويقرر يقسمنا  
لجروين واقع انا في جروب الوفد الصومالي.

بعد امتصاص الصدمة تقبلت الموضوع ووصلنا المطار وانا كُلي حقد وغل  
من الجروب الأول وبدعي يارب ماييجي الوفد بتاعهم.

فضلت واقف مستنيهم وباقي الجروب اللي كان معايا زهقوا م الانتظار  
خرجوا وقفوا برا.

شوية وجه واحد شبه باسم سمرة كدا وقف جنبي.

= لو سمحت؟

- الأمر.

= هي الطائرة وصلت؟

- لاء .

= هو انت ماسك اللوحة دي ليه ؟

- مفيش انت عجبك يعني حال البلد ! عازين نسقط النظام .. امسك

كدا .. خاف ومشى .

شوية ووصل الوفد .. سلمت عليهم وواحد منهم استأذن يروح يعمل بي بي !

طبعا زمان الدماركين هارين العيال بوس وأحضان، وانا اللي نازلي ماسك

نفسه م الصومال وجاي يفرغ مشاعره هنا .

- اتفضل ياعم روح اتفضل .

خلص إفرزاته وشدينا السيوفون وشدينا ع المستشفى .. طول ما احنا في

الطريق قاعدين نكدب ونكلمهم عن ماسر وعظمة وجمال ماسر وحضارة

سبعآلاف سنة . . وهفم باصين م الشابيك شافين حي السيدة زينب حيث

المديح ومقالب الزباله والعيال الصغيرة اللي بتجري في الشارع من غير لباس .

الدماركيين زمانهم قافلين ستاير الباص ولسه بيوسوا في الجروب بتاعهم .

- إيه يادكتور بتبصلي كدا ليه ! لاء امسك نفسك احنا قربنا نوصل

خلاص .



## صلة الرحم

وكذا احنا خرجنا بره المستشفى بحكاياتنا وجينا لحكايات من نوع

خاص.



## إيه رأيك في العثير ؟

في يوم كدا امي قررت تفكر واحدة صاحبها من ٣٠ سنة كانت قاعدة معاها في نفس الديسك في رابعة ابتدائي وحببت تزورها !

\* دخلت عليها الاوضة \* ..

= إلبس عشان خارجين .

غالبًا انا مابسمعش الجملة دي غير وانا داخل على امتحانات .

- خارجين فين احجة ؟ !

قالتلي: هنزور واحدة صاحبي وحشاني .

- طب وانا إيه دخلي بجو "خدني الحنين بعد السنين جيني هنا" دا ؟ !

= إخلص يلا . .

- ياما ما تعبنا فلك .





= عادي شمروه كدا . وقامت مشمرالي كوم القميص، و ثانية كانت مضيقالي البنطلون! أهو شايف الوجاهة؟ \* بصوت اللمي \*

أمري لله.. لبست ونزلنا ركبتا مواصلة.. ولصدفة كونية ما تكون راكبة في نفس الميكرو باص بت زميلتي في الدفعة . هالار اسود.. أول ماركبت لحتني.. لقتها مستغرباني جداً \* طبعاً انا لو حلفتك ان دا لبس ابويا ولا بسه غضب عني مش هتصدقيني \*

قاعد طول الطريق قرفان من نفسي ومن امي وصاحبتهما وفخاد الست اللي كانت جنبي.. ياست لمي فخادك بقا انتي كمان شعارف اقعد .

أول ماوصلنا الشقة رنيت الجرس فتحلي عيل صغير سرق مني شنطة الفاكهة وجري على جوه! خُد يالا هات صباع موز طايب! إحنا دخلنا جبالية القروء ولا إيه!

أخيراً قعدنا بعد ساعة ونص بوس وأحضان وإيه المفاجأة الحلوة دي..

شوية وطنط بدأت تعمل حركات غريبة بوشها كدا قولت يمكن دبانة قرفاها ولا حاجة.. ببص ورايا لقيت بنتها برضو قرفاها دبانة هي كمان.. فهمت انها بتشاورها تيجي تقعد معنا.. جت سلمت علينا وإيدها صينية عليها عصير

ولقمة القاضي! وتقريبًا اللي فاض م الدقيق دهنت بيه وشها .

قعدت تبصلي، وانا مشغول بعصير الجوافة .. كان طعمه وحبيبيش ..

فجأة امي وطنط افتكروا ان فيه بوتجاز ابو ١٢ عين اللي جابته طنط من ١٠  
سنين لازم تقوم تفرجها عليه، وسابونا وقاموا!

فضلت انا قاعد انامل في سقف الشقة واعد في لمبات النجفة والبت شكها  
مابتعرفش تفتح مواضيع فقالولي عجبك العثير؟! قولتها لاء .

قامت جريت ع المطبخ رجعت بعصير فراولة ..

. هالار اسود إيه ابت شجرة الفاكهة اللي زارعينها جوه دي! إهمدي بقا .

شوية وامي خرجت وقالولي يلاعشان نمشي وبتغمز لطنط! والبت بتبص في  
الأرض! واخوها بياكل الموز ويرميه عليا! وانا مش فاهم في إيه! لحد واحنا  
نازلين سمعت امي بتقولها هكلمك قبل ما اجيلك تاني واعرف رأيي! . أهاااا  
فهمت انا كدا دلوقت .. أمي كانت وخداني عشان تعرف رأيي في العصير  
بتاعهم

. برضو وحبيبيش .







## عجبك العثير \* الجزء الثاني \*

وتر الساعات وتفتت الأيام والأسابيع والشهور وفي يوم مشرق مطلعوش شمس

تدخل امي عليا الأوضة..

= إصحي يلا اصحي . . إصحا ||||| عععع .

- إيه في إيه؟! بسررررعة طيب شيلي طقم الجيلي م النيش انتي وانا

## هجيب الموبايل والشاحن واحصلك.

= چیلی ایہ وشاحن ایہ یا اہبل!

- هو مش برضو البيت بيولع؟

= لاء مفیش حاجۃ بصحیک اقولک ان خالک ام نسمة جت هی وبنتها .

- مممم يعني انتي دخلة عليا دخلة أمين شرطة مسك حرامي غسيل في حارة سد عشان تقويلي ان صاحبك شرفت هي وبنتها ! مايكش تولع صاحبك على بنتها امشي من وشي ياماما ل انرك اسمها بكرة في صفحة الحوادث. . امشى.

= طب قوم يلا هات حاجة ساقعة.

\* عملت seen وماردتش \*

دخلت تانى . . شدت البطانية من عليا . .

= إنت هتصحى ولا لاء؟

- لا.

= لاء هتصحي .. منا لوريت ويا كلمة تشمع کت صحيت اما انا

ماربٹش ودي النتيجة... \* مش عارف ليه امي مادخلتش موسوعة

## چینیس فی الندب لحد دلوقت؟ \*

- بااااا اس اقلی شریط عبلة کامل دا اتیلنا خلاص .

\* قومت وانا مقرر اخلي امي تشيل من دماغها الفكرة دي خالص ..  
فروحت خارج لهم بالبوكسر أه والله بالبوكسر ..

البت نسمة قعدت مكسوفة وظهر على وجنيها الملتحطين بالدقيق شعور  
الخنجل \* ..

. أهلاً أهلاً ازيك ياطنط .. ماما هو فين البنطلون الاسود بتاع تشيلسي  
اللي خالتي جابتھولي وانا في ساعة ابتدائي؟

\* أمي بتجز على سنانها \* : معرفش هبقا اشوفھولك البس أي زفت  
دلوقت استر نفسك هھھھ لا مؤاخذه هو أصله بيحب بناطيل الكورة يرتاح فيهم  
ھھھھ ..

\* دخلت وخرجت ثاني \* ..

- ولا بتاع ريال مدريد اللي جابتھولي في خامسة ابتدائي؟ !

\* يدوب الحق اتصل بيهم في المستشفى يجهزوا لعملية مرارة .. أمي قربت  
تكسر ضرس العقل من كثر الجز \* ..

- طب خلاص خلاص انا هدور عليه ازيك يانسة؟

اتحنحت كدا وفضلت تبلع في ريقها وتلم في دماغها وقالتلي ببطقة صوت  
صرصور الحقل: إحم الحمد لله انت عامل ايه؟

- مالكيش دعوة.

\* أمي قربت تنفجر \* ..

- بهزر بهزر .. أنا الحمد لله .. لقيت بطلون تشيلسي فاضل الريال.

\* فضلت قاعد في أوضتي العب need for speed ومعلي الصوت ع  
الآخر .. لقيت فجأة امي دخلة وإيدها مسّاحة الحمام \* ..

. يا حجة اهدي لقيت البناتيل خلاص لقيتهم .

= انزل يا جزمة هات فاتنا برتقان واحترم نفسك قدام الناس .

- ماهوم الآخر كدا اللي بتفكري فيه وبترميله دا مش هيحصل وفكك ..  
جاملي صحبتك بعيد عني .



= أه يعني انت فاهم بقا .

- اُہ و انتی عارفة کو یس انی ماجبہاش و مش ہشربہا .

= ھي ايه دي؟

- الفاتما برتقان.. انتي عارفة اني بحب البيبي أكتر..

أه يا عيننا ابي له مد الإيد طابايب.

\* وما صدقت اني فكيت م البيت فخرجت مارجعتمش .. روقت لخالتي

اسألها على بنطلون ليفربول اللي جابتهولي في رابعة ابتدائي \*

#یاخو فی لتکون طنط و بنتها جابین علی بیات!

#یا تری امی هتسألنی ع الفاتتا بقا ولا "الحمد لله نسیت السند وشت".

#البنات كلها بتحط في وشها بودرة إلا نسمة بتحط وشها نفسه في البودرة.

#وانا اقول الجبس اللي كان تحت السلم راح فين؟!





## "خلي بالك من جيرانك"

وعشان النبي وصى على سابع جار فقررت اكتب عن جيرانى  
الأعزاء اللي أبطاله هيكونوا خالتي أم سيد وعم أبو سيد وعم  
حسن اللي متأكد ان يوم مايقع تحت أيدهم الكتاب  
هيسخدموه عشان يسندوا بيه رجل تراييزة السُفرة أو يلفوا في  
ورقه سندوتشات . . أسيبكم معاهم .



## خووود ذاكر للواد

قاعد في أمان الله لقيت الباب بيخبط فتحت طلعت خالتي ام سيد جارتنا . .

\*ولن لا يعرف ام سيد . . دي أبقى انا المدرس الخصوصي المجاني لابنها الصغير

التخين الغبي\* . .

= سالخير يا أوساز زيزو.

. أوساز! ماشي سالخير عايزة إيه ياختموسيد؟!

= إني خد الواد ذاكرله شوية.

. وهيا كانت لسه الدراسة بدئت!

= معلش ما انت عارفه عايد السنة وعازياه يبدأ المنهج بدري، ذاكره شوية حساب.

.. مانا قولتلك قبل كذا ان ابنك متخلف في الحساب .. مايعرفش بفرق بين

الجمع والضرب بسأله  $3 \times 3$  بكام بيقولي ب ٦ . . والقسمة اقله لو معانا ٩

تفاحات هتقسمهم على ٣ كل واحد هياخد كام؟ بيقولي عادي اللي

عائز ياخذ حاجة ياخذها ! إنك بيستظرف في الحساب.

= أهااا طب سيبك م الحساب بقولك ذاكرله شوية عربى .

. مانا قولتلك انه حمار في العربي . . والنحو عامله عقدة ما يعرفش الفاعل

من المفعول.

= بلاها عربي .. الدين .. خليك في الدين عايزاه يطلع متدين زي خاله

ولید کدا.

. هو مش وليد اخوكي دا اللي مسكوه مع مزة في سينما فاميلي الإسبوع

اللي فات؟

= مش قدام الواد ياريزو عيب كدا، بعدين فيها إيه لما يخش سينما مش

زي باقي الشباب اللي في سنه.

. أه برضو لازم يبقا نموذج للدين الوسطي اللذيذ .

= بعدين خلي بالك ابني بيحفظ بسرعة.

. بيحفظ ايه! دا جدول "٨" اللي أي رقم يضرب فيه يبقا هو نفس الرقم

مش حافظه! وبعدين لما بذاكره دين بيحفظ وبسببه لما ينسى نص

الحديث .. أفهمه ان يابني عيب كدا لازم تتأدب في المادة دي بالذات لأن

دا دينك ودين أبوك ودين أمك يا أخي ماتضايقتيش .

= طب هو عامل ايه في الانجليزي .

.....

= خلاص بيقا تذاكرله مادة الأنحاء داهين.

. إيه أنحاء دي؟

. أنحاء بتاعة ضكطور مصطفى محموه.

. أهأا أحياء!!! يا ستي بطلي تعايطي بقا وركزي ابنك في تالته ابتدائي

أحياء إيه اللي ياخذها! قصدك علوم.

= أيون هيا دي ذاكرهاله بقا.

. ياختمسيد ابنك كل علاقته بالعلوم انه عارف لما هيروح اعدادي هياخد

درس التكاثر.

- ودا إيه التكاسم دا؟!



= تكاصم ! تكاصم أمين . . التكاثر دا اللي هو بيشرحلهم فيه انتي والحبح

جبتوه ازاي للدنيا .

. قلة أدب كمان في المدارس !

= ياستي دا علم .

. لالا مش عاوزة الواد تبوظ أخلاقه .

. دا اللي هي فين دي ؟ ! طب بصيله كدا بدمتك مش دا مشروع متحرش

قد الدنيا أو حرامي فراخ بلدي ؟

= ههههههه والله عندك حق .

. أهو شوفتي سيبيني بقا اخش انا م .

= خليك جدع دا الواد امتحانه بكرا .

. امتحانه بكرة دا يعني مفروض هو مذاكر فانا يدوب اراجعه . . إنت

مذاكر ياض؟

= لاء ملحقش يذاكر . . أصله طول النهار يلعب في الشارع هاهاها .

. أه وانتي سيباه يلعب وعارفة ان امتحانه بكرة ! عطلاق لو ماخديته

ومشيتوا من قدامي الساعة دي ل انزل إسمك صفحة أولى في الحوادث

بكرة بأشع جريمة حصلت في تاريخ البني آدمين . . امشوااااا .

= طول بالك بس . . أهو ذاكرله أي حاجة يكتبها في الامتحان .

. لا مش فاضي انا عندي امتحان انا كمان ومش فاضي اتكلي ع الله بقا

اختموسيد .

= كدا . . طيب وسعلي بقا انا دي على امك اقولها انك كنت بتعاكس

البت ريهام امبارح .

= وعلى كذا ابنك عنده مادة إيه اذاكر لهاله؟

= مش عارفة.

. ودي ياخذ فيها إيه؟! ياسستي امال اذاكر له إيه انا؟!

= أهو ذاكر له من كل مادة شوية واللي يثبت في دماغه يتنيل يكتبه.

. على فكرة ماعنديش مشكلة في دا . . مشكلتي في ابنك نفسه . . ابنك

غبي جدًا وعلى طول فاتحلي بؤه وانا بشرح.

= والله ماعارفة يا بني طالع كذا لمين؟!

. متأكدة انك مش عارفة؟ ماعلينا هذاكر له عربي . . أول يوم دايماً بيتقى

عربي وهو وحظه بقا . . معاك يا بني الكتاب؟

\*بيدور ما بلاقهوش\*

= أحيه يكوئشي دا الكتاب ياواد اللي قولتلي مش محتاجه فخذته طلعت  
عليه البطاطس المقلية عشان اغدي ابوك.

. وحبكت تطلعي ل ابوہ البطاطس على كتاب العربي ؟ ما عندك الحساب  
بيشرب الزيت أسرع!

بقولك اختموسيد على فكرة امي كانت عايزاكي تحكيها ام محمد كانت  
بتزق مع جوزها ليه أول امبارح.  
. بجد طب وسع اما ادخلها .

\*خذ يا ضاقولك\*: روح قول لخالك وليد زينو بقولك هات رقم المزة اللي  
كات معاك في السينما عشان عايز يخش الفيلم هو كمان.







بقدونس ولا كُسبرة؟

يوم كنت أجازة م المستشفى ومرتاح من دوشة الاستقبال وحناقاته وقاعد  
بزن على امي تجهز الغدا فلقتها التحولت فجأة وقامت مصوطة وقايلالي:

- عايز تطفح روح انزل اشتريلي بقدونس اعملك بيه السلطة.

– طب وبتصوتي ليه دلوقت! آمال لو عايزة جرجير كنت عمليتي إيه؟! المهم نزلت اشتري البقدونس وانا متأكد اني هرجعلها بكسبرة وبتحدفني بيها كالعادة.. رocht وقت عند خالتي ام شلبي بتاعة الخضار وانا في حيرة من أمري! خايف امد ايدي ع البقدونس الاقيه قالي انا مش كريم انا كرم.. بعدين بقا طب إيه حادي بادي؟ أه يلا حادي بادي، ووسط منا خلاص كان فاضلي سيدي محمد البغدادى واختار واذا بخالتي ام شلبي قامت مصوطة هي كمان:

= خالاهنااي، بقالك ساعة بتقص في أم الحضار انت عايز ابييه؟!

- إهدي طايب اختموشلي فيه إيه! ما الناس كلها بتقصص اهي اشمعنا  
انا.

= خالالا اصناااي.

- جرااا إيبية ياولية فيه إيبية؟!

إيبية الدخلة بنتلكب دي!

= دا أحرك ياختموشلي! دي ضرباكي بكيلو بطاطس! دانتي وشك زرع  
بطاطس يا شيخة، تقومي ردة عليها بجرجير. . إخس.

ردت ختموسيد: بقا بعتالك العيل الصغير ومدياه تمن كيلو، يرجعلي بُص  
لاء وبايط كمان! تكوينش مستقلة بينا ولا إيبية ياختي.

= مستقلة وسلوقة هاهاها.

- اسكت انت.

= حاضر

- والتبي ماحصل، روعي شوفي ياختي ابنك العجل بياخد الفلوس يوديه  
فين ولا ودي النص كيلو الثاني فين!



= ياخوانا صلوا ع النبي وهاتوا البقدونس خليني امشي . . بس صحيح  
اختموسيد مايمكن الواد بياكل البطاطس، دانا شوقته مرة بيقترض في  
الشجرة اللي قدام بيتكوا تقريبًا كدا ختموشلي قصدها نقول ان اتوا  
جعانين.

- بقا احنا برضو اللي جعانين يا ولية يابتلكب ياللي خضارك بيد هولك  
من بواقى أكل البهايم يا ام بطاطس ضاربة.

- بقا انا خضاري بواقى أكل بهائم وبطاطسي ضاربة؟  
= على فكرة وفيه ببتلكب اتقالت في الأول.

- أهواني اللي بنت ستين كلب بقاا وديني لاجيبك من شعرك.

= ياخوانا اهدوا . . طب البقدونس ياختموشلي الحق امي بالسلطة انا  
جعان.

= أهه دي عيني انا ياختموسيد، عيني انا، عين ام شلبي اهي.

وما صدقت سلكت منهم وسط الخضار اللي بيتحدف والناس اللي واقفة  
تحوش انا لسه برضو في حيرة من أمري، ياتري دا بقدونس ولا شبت ولا  
كُسبرة؟!

قومت واخذ ٣ حِزم م الحَضار اللي كان قدامي وخلص، كانوا بدأوا يحذفوا  
بعض بالاقفاص... وصلت البيت بديه لامي حدقتني بيه طلع شَبِت وكُريرة  
وفجل.

# يكونشي اللي كان شابط في قفا ختموسيد في الخناقة دا البقدونس؟!







## الأقيش معاك بصلتين؟!

قاعد قدام التلفزيون، فامي ندهت عليا انزل اجيبلها بصل من عند خالتي ام

سيد جارتنا عشان التوم اللي عندنا خلص وهي عايزة تعمل رز بلبن..

المهم نزلت فرنيت الجرس.. ونسيت خالص ان عم ابو سيد بيكره جدااا

اللي يرن الجرس، أمال مركب أمه ليه طايب! فانا ماكنتش اعرف انه جوه،

فقعدت ارن ارن ارن بستعيد ذكرياتي وانا صغير كت بفضل ارن واطلع

اجري.. حَكَم عم ابو سيد عصبي أوي وانا مستفز وجب انرفزه

المهم شوية ولقيته بيصوت:

- مiiiiiiiiين برااااااع.. مiiiiين؟

= دا انا ياعمبوسيد .

- أيوووة انت مiiiiين يعنيي؟

= طب افتح طايب وهتعرف!

- ميسين؟

= هالار اسود . . أنا بقولك انا .

- إنت ميسين؟

= افتح طاييب .

- وبعديين بقا .

= ياعم افتح هو انا هخطفك!

\* المهم فتحلي الباب وعينه بتطق شرار . . قولته بكل برود: ساخير

ياعمبوسيد الا هي فين خالتي ام سيد؟

- عاز ايه من خالك ام زفت؟

= مفيش كنا هنا قش آخر القضايا المعاصرة لسبت البصل اللي عندكوا ف  
البلكونة.

- لا خالك ام زفت مش هنا غضبانة وهطلقها قريب.

= يلا مش مهم.. خش هاتلي بصلتين.

- ألا صحيح انت مابتذاكرش للواد ابني حلويه؟! الواد درجاته زالخر  
الشهر اللي فات بسبك.

= ياعمبوسيد ابنك بقاله سنتين ف تانية ابتدائي، أمال لوف تالته كان قعد  
أد إيه وتقولي درجات! وبعدين انا مفهم امه انه هيبقى مشروع لمتحرش  
أد الدنيا أو حرامي فراخ بلدي.

- مممم يعني انت دلوقت منرفز او مالاي وشغال رن وحرق ف الجرس دا  
غير الواد درجاته زالزت في المدرسة بسبك وجاي تقولي عايز بصل!  
- أه ياريت بسرعة.

= بس کدا لاء عنيا ياحيبي خش تعالى خد البصل.. تعالى ماتخفش

\*بيجز على سنانہ\*.









## هو كتاب الإجابات يقول إيبه؟!

أمي شدتني نروح تقعد شوية مع جيرانا عمبوسيد والسيدة حرمة.. بعد رجوع ختموسيد بالسلامة لبيتها \*أصل كلام في سرکوا كان فيه بينهم حبة ضغائن كدا والحمد لله النفوس صفيت ورجعت العصفورة لعشها \*.. المهم في وسط منا قاعد زهقان لدرجة كنت متابع حوار بين ثلثين ماشيين ع الحيط ورا قفا عمبوسيد.. فجأة هبت في دماغه وقام قايل للواد خووش ياض هات شنطتك كدا خلي ظيلظو يظاكرلك شوية.

- لاء اذاكرله إيه دلوقت! صلاة العصر وجبت.. يلا انا نازل اصلي عازين حاجة وحمد الله على سلامتك ياختموسيد سمعليقو سمعليقوا.  
= خوود بس هنا رايح فین عصر إيه! دا المغرب اللي أذن وابقى صليہ بعد اما تنغدى، ظاكرله شوية يلا خليني اشوف موصتواه.

مالقش مفر ولقيت ابنه التخين الغبي جه وجايب شنطته كلها، بفتحها اطلع  
كتاب خارجي لقيت سندوتشات فول معفنة بايئة بقالها يومين.. أففف الله  
يحرقك.. بدب إيدي كدا طلعت فتافيت لنشون وورق جبنة نستون وأكياس  
مناديل وغطيان أزاين بيبسي وكروت شحن فودافون متخرشة! الله يجزيك  
انت يالا بتهرب م المدرسة تروح تفرش في العتبة؟! طب في عندك شرابات؟!  
أخيرًا الحمد لله لقينا كتاب خارجي في ثاني سوسنة بعد سلسلة محلات  
الشراوي.. طلعت الكتاب اديت الواد مسألة، فضلت مستنيه يحلها، إيدو  
بتترعش وقاعد خايف من ابوو وعرقان وشكل الريحة دي ماكش م الفول اللي  
في الشنطة. الواد عمل بي بي على روجه ومش عارف يحل المسألة.. وبصراحة  
ولا انا.. فقومت قايله بقولك ايه قوم هاتلنا كتاب الإجابات.. عشان اقعد اديله  
في مسائل مايعرفش يحلها ولا انا كمان فنأكد م الإجابة على طول.. وانا بذاكره  
المادة في ساعة زمن وهو غباء مساعدني انا ننجز.. وعمبوسيد قاعد

باصللنا مركز معانا أوي، فبقيت اديله مسألة من هنا وهو يبص في الحل وينقلها  
من هنا ..

برافو يا حبيبي برافو .

فضلنا كدا لحاااا ما فجأة عمبوسيد وشه احمر . وقالنا: اتوا إيه اللي  
بتعملوه ده؟! إيه ده؟!

- يا عمبوسيد اهدى بس هفهمك .

= تفهمني إيه وزفت إيه! وانا اقول الواد مصتواه زالحرا ليه! أثاره پسند  
على كتاب الدين وهو بيدأكر! لاء كله إلا الديين يابتلكب إلا الديين .

- أه صحيح بتسند على كتاب الدين يابتلكب . أمؤاخذة عمبوسيد

. كمل حل يابني كمل، أنا عرفت دلوقت انت طالع كدا ملين .



یا اے بنو کو شارع نصابیت..!



## كل سنة وانت طيب

في درجة حرارة وصلت لـ ٣٥° قاعد قدام التلفزيون مانتخ مش لابس  
غير بوكسر بس.. ملقمتش حاجة تتلبس في الجو دا تاني.

\* فالباب خبط قومت وقفت ورا الباب \*:

- مين؟!

= أنا.

- طيب.

وقومت راجع نايمع الكنبه..

\* خبط تاني \*..

- ماقولنا ميين؟!

= أنا.. أنا.

- أبوة يعني مالكيش إسم، صفة؟ فصيلة دم؟

= يا بني انا خالتك امو محمد ااااا .

- أمي مش هنا اختو محمد .

= لاء انا عايناك انت .

- بصيت لمنظري كدا ! لاء تفهمش غلط ازيزو هي ماشافتكش وانت

علوضعك كدا \* وبسرعة قومت ناطط في أي تيشرت وبنطلون

وحاطط حاجة على راسي وقتحتها \* . .

- أبوة اختو محمد؟

= إزيك ازيزو اعسل .

- الحمد لله اختو محمد اطحينة خشبي في الموضوع الجو حر .

= كلسنو تطايب ورمضان كريم .

- إحنا لسه في شعبان ! عموماً واتطاية الله أكرم هااا ؟

= بنلم فلوس زينة رمضان بقا .



– طیب ربنا یوفقکوا۔

= لاء ما احنا عايزين منكوا عشة جنبه اشتراك.

- إحننا لسه في شعبان.

= يابني ما احنا هنعلقها قبل رمضان.

= طب ماتفككوا السنة دي مش لازم زينة، أقولك الشارع اللي ورانا فيه كام جبل كدا من رمضان اللي فات هاتوهم اغلستهم وعلقوهم كدا كدا بيتقطعوا بعد العيد .

= مش لازم ازاااي الشوارع اللي حوالينا عقلت و.....

-أيوة أيوة وانت عايز الشوارع تأكل وشنا وكدا، ماشي هديكي أم العشة جنيه بس بقولك ايه تعلقوا قدام بيتنا بالذات ٥ فروع مش فرعين ل احسن وربنا هجيب السلم بالليل والمها كلها اروح ابيعها انا بقولكو اهو.

= ههههه لالا ماتلقش ازیزو اعسل.

المهم اديتها العشة جنيه ورجعت وأنتخت.

**\*شوية والباب خبط تانى\*..**

- مش هنخلص بقا . . ميبين؟

= أنا خالك اموسيد ازيزو افتح.

- أمي مش هنا اختموسيد .

= مش مهم افتح انا عايزاك.

- هااا اسود هو انا الطلب عليا كثير كدا ليه النهاردا !

قومت نظيت في أم التيشيرت والبنطلون بس ماحطتش حاجة على راسي بقا

ختموسيد مش غريبة

- إيه اختموسيد أمري؟

= كلسنة وانتطايب ازيزو.

- إحنا لسه في شعبان وختو محمد لسه قفشة مني عشة جنيه للزينة هااا؟

= لاء انا ماليش دعوة بالزينة، أنا بلم للفانوس.

- مم ودا اشتراكه كام؟

= يعني اللي تجيبه عشة . . عشرين.

- عشة عشين! بس كدا لاء حاضر من عنيا، ثانية واحدة.

\*قومت داخل مدعيس فوق الدولاب جيت سلك كهربا وقشرت الطرفين  
وخرجتلها\*.

- إمسكي كدا اختموسيد .

= دا إيه دا يازيزو؟

- دا السلك بقا اللي هنور بيه الفانوس، أنا بس هجره فيكي عشان  
شاكك انه مايكهربش.

\*لقتها في ثانية سابت السلك واتبخرت من قدامي\*..

- يلا يا ولاد النصاابة.. عنبوكووا شارع.

قلعت ورجعت لأنتختي اقلب في التلفزيون .. لقيت مشهد ساخن لأوساز  
احمد مظهر ولبنى عبعزيز بيوسوا بعض في الشقة وفجأة الباب خبط عليهم.

- ييببي مين ابن الرخمة اللي بيخبط عليهم دلوقت؟! أكيد ختموسيد بتلم  
فلوس الفانوس.

مان أوف إمبوسيبول

"عم حسن"

"عم حسن" جاري العزيز أو اللي كان جاري وده قبل مايسافر يستقر عند بنته في السعودية "مسألة عائلية مالناش فيها" . .

المهم ان عم حسن كان صديقي اللدود لفترة كبيرة وقعدتي كانت على طول معاه وليه فضل كبير في تكوين الجانب التأفه جوايا اللي انتوا ملاحظينه على مدار الكتاب .

## الصلاة خير من النوم

عم حسن كان بطبعه متدين أو يعمل اللي عليه.. فهو كان طول الوقت حريص على إنه يعدي عليا في صلاة الفجر يصحيني نروح المسجد فكان بيعدي يرن الجرس:

= إصحى يازيزو.

. أيوة ياعم حسن انا صاحي اهو.

= إصحى الفجر أذن.

- حاضر اعم حسن هصحى وانا صاحي حاضره.

= يابني الصلاة هتقوتنا.

- .....

= إنت نمت.

- ياعم والمصحف صاحبي.. طالعك اهو.

= براحة ياع... وانجز نلحق الصلاة.. الصلاة خير من ال

\* بیٹا اوب \*

- طیب.

**\* واحنا ماشيين في الطريق \***

= يابني امشي عدل وسيبك م البتاع اللي في إيدك ده بقا وانتبه للطريق.

- إسنی بس اعم حسن هکتها استاتیوع الفیس "صلاة الفجر راحة".

\* slaaaap \* کف مفاجئ.

- اللہ یاعم مابور اااا حااا .

وصلنا المسجد و الركعة الأخيرة م الصلاة سامعه يقول في السجود " آمين . .

أَمِينَ. . أَمِينَ! فخلصنا صلاة فبقوله: آمين إيه دي اللي عمال تقوها طول ما

احنا بنصلي! قالي الراجل اللي كان جنبي صوت أمه عالي في الصلاة مشوش

علياً مش محليني عارف اركز لا مني عارف اقول "سبحان ربي الأعلى" بانتظام  
ولا مني عارف ادعي في السجود فقاعد اسمع دعاه واقول آمين واهو يقي اسمي  
قولت حاجة وانا ساجد .

!..... -



## سُكْر بَرَه

عز أغسطس .. قاعد زهقان م الحر قولت انزل اقعد مع عم حسن وبالمره  
اطلع زهقي فيه شوية.

\* في بيت عم حسن قاعدين مانتخين شبه البطاريق في موسم التزاوج \* ..

= زيزو.

- ممم.

= ما تقوم يا بني اعملنا شاي.

- مش قادر قوم انت.

= يا بني عيب تقول كدا البيت بيتك.

- لاء ده بيتك انت وبعدين مش قادر اقوم كسوف .. لاء ده كسل عادي.



= بصراحة وانا كمان كسلان.

- خلاص یقا بلاش شای بعدین انت شکک راشق کدا مستنی مشهد معین

انا عارف الفيلم ده علفكرة.

**\* عم حسن بانشکاح \* : آية آية .**

- مش عارف انا إيه مراهق تالته اعدادي الى قاعد معاه ده!

= ششششششششش اهو جه يامعلم.

\*سمنة البقرة الحلوب.. طواجين ام حسن.. كشري الونش.. غسالات

وتلاجات وشوايات زانوسی \*

=بيبي على أم ده فصلان حلني بقا على مايجي الفيلم تاني ساعة ونص

## إعلانات.

- ہاھاھا کدا اقدر اقوم اعمل الشاي وانا متظمن .

= وانا هتعد في البلکونة.

- عم حسن شايك إيه؟

= ثقيل والسكر برا.

\*بعد شوية\*..

- إمسك يا معلم.

= إيه يا بني ده فين السكر؟

- سيبتة برا.

\*ودي كانت أول مرة اعرف ان عم حسن ما بيشخرش بس وهو نايم! \*.



## قولي نصيحت

\* في بيت عم حسن \* ..

= مالك يابني مسهم ليه كدا مش عوايدك!

- مفيش ياعم حسن مود كدا .

= ليه بس كدا حصل ايه بينكوا ؟

- بينا مين ؟! هاه مين ؟! ماتعصبينش .

= جرا ايه يا ع . . . مش بقول انت ومحمود .

- أنا جبت سيرة محمود خالص بقولك مود . . حالة كدا يعني مخنوق

شوية وخلاص .

= خلاص روق روق .

- طيب.

\* صمت طويل \* ..

- بقولك ياعم حسن مش انت راجل كبير ومُخضرم ولك تجارب في الحياة.

= يابني انا شاب لكن عمري ولا ألف عام وحيد ولكن بين ضلوعي زحام....

- ياعم ضلوعك إيه وفخادك إيه بس انجز ماتجودش.

= احترمني عن كدا ياع...

- أنا اقصد يعني انك راجل خبرة وأكيد مر عليك كثير لحد ما دقنك غزاها البياض فيلا بقا اتقلي خبرتك وقولي جملة كدا افضل فاكرك بيها بعد كام ساعة قصدي بعد عمرٍ طويل.

= حكمة ممم موعزة يعني عاوز موعزة.

- موعزة! خلاص خلاص مش عاوز حاجة شكرًا.

= إسمع بس هقولك والله عندي شوية مواعز حلوين .

- إنت ليه محسسي انك فارش بشرابات وملابس داخلية في العتبة!

= ناوي تسمع ولا لاء؟

- هاللا خلصني .

= طيب الأول اقلب بس ع اللي انت جايهولنا ده الأول .

\*قلبت فجئت لقطة من فيلم أجني اتنين ببيوسوا بعض\* ..

لقيته سرح كدا وقالي بص يا بني اتعلم طول ما انت عايش في حياتك إيااك  
إيااك تمسك أم الريموت وتضيع على نفسك لقطة زي دي عشان تجيب شوية  
عيال بتجري ورا كورة .. ضيعت عليا المشهد من أوله الله يحرقك .. قوم يالا  
اعملي شاي .. قوووم .

- ..... !



العید فرحتہ یاعمر حسن

ويجي العيد ومن فرحتي به بقضيها نوم كالعادة. . فقررت انزل في اليوم

التالت عدت على بلکونة عم حسن ..

- اُعم حسن .. اعم حساها ||||| ان .. اعم حسد ...

= إيه فيه إيه! فيه إبيه باع\*\* عامل دوشة ليه؟

—ایہ یا معلم واحشني العيد عدی وما شوقتكش ونسیت تقویٰ کل سنة وانا طیب.

= يا بني انت مش كنت جنبى امبارح فى الصلاة؟!

- جنبك فين انا محضرتش صلاة العيد هنا كنت في الشغل .

= ياراجل! مش انت اللي كمت لابس جلابية بيضة وقاعد جنبي وبقول التكبيرات؟!

- ياعم الناس كلها بتلبس جلاليب بيضة وأكيد ما بيغنوش النشيد الوطني

كله بقول التكيرات .. يلا سماعليقوا.

= طب خد بس رايح فين كدا ؟

- خارج هفسح البت اختي الصغيرة.

= طب معاك فلوس.

- لاء هات.

\* بيتااوب \* ..

- بقولك ماعيش هات بقا احدف.

= وانت طيب احبيب ألي.

- وانا طيب .. هي بقت كدا ماشي.

= إبقى خلي بالك بقا كئات سدى البلد جاينة أخبار تحرش في وسط

البلد .

- كئات ! وانا اعمل ايه يعني ؟ ! وبعدين تحرش ايه يا عم حسن اللي هيكون

بنت صغيرة مش للدرجة دي بقينا قذرين .

= لاء انا اقصد يتحرسوا بيك انت هاهاهاها .

- قولتلك ميت مرة بطل تقول إفيه وتضحك عليه لوحدة .

= طب خلاص خد استنى هفك .

- أوبة كدا يا أخي زكي عن مالك . . إشطة احدف .

= هفك ميا احسن محصور هاهاها .

- طب خش جوا بقا خش جوا لا احدفك بالطوب .





# قصة حب

## إيجيشان لف استوري

بعد تدقيق وتفحص وتحيص ودبلومة في أسامة منير أكتشفت ان العلاقة بين أي اثنين في مصر بتمر بكذا مرحلة وكل مرحلة حطيت ليها مسمى .. مثلاً ..

١: المرحلة الأولى اسمها "بتجيني آهدى": والمرحلة دي كل واحد بيكتشف الثاني ويشوف أي حاجة حلوة بيحبها الطرف الثاني ويعملها ودي بتبقى أحلى المراحل حرفياً .

٢: المرحلة الثانية "كل اللي فات حمادة واللي جاي ماتسلميش على حمادة": بيتدوا ياخدوا على بعض شوية وبزودوا في الكلام وهو بيتدي يفرض سيطرته كراجل شرقي بكرش متواضع زي تلبسي إيه، وقبل ما تخرجي وقبل الأكل وقبل البيبي وقبل النوم تتصلي عليا تاخدي موافقتي، وأهم من دا كله متسلميش على \*حمادة\* ابن خالتك عشان بغير .

٣: المرحلة الثالثة "يادكري": ودي هي بقوله حاضر في كل حاجة وهو طبعاً بيفرح فرحة عم بخ لما جه حد عزاه في ابوه ويفكر انه كدا خلاص

تأجير وسيطر، في نفس الوقت اللي هي بتعمل كل اللي هي عاوزاه ومبتاه بـ  
الطريقة.

٤: المرحلة الرابعة "الملل": في المرحلة دي بيتدوا يتخنقوا من بعض ويفحسوا  
ان الكلام متعاد وان العلاقة بينهم بقت باردة وبإبحة وبقا بيسيبيها تسلم على  
حمادة ابن خالتها كثير!

٥: المرحلة الخامسة: مرحلة "التلكيك" \*وكان بتقولي مساء الخير! \* ودي  
مرحلة ما قبل الفركشة بتبدأ تزيد الخناقات بينهم على أي تفاهات! ويفضلوا  
يتخانقوا مع بعض وخلص على أي سبب زي مثلاً ما قولتليش ليه انك رايحة عند  
عمتك \* اللي هي أصلاً ساكنة في الشقة اللي قصادهم! \* .. ما انت كمان  
متصلتش بيا قبل ما تنزل تلعب كورة مع صحابك... قيس على كذا بقى  
الباقى.

٦: المرحلة السادسة والأخيرة "إنتي تستاهلي واحد احسن مني": والمرحلة  
دي بتأخذ وقت شوية لأن كل واحد بيتقى مستني يجيب الغلط على الثاني،  
هي... بتبدأ تمهد ان امها بتزن عليها كثير الفترة دي على إن \*حمادة\* سافر  
الكويت وكان نازل الشهر الجاي يشوف امه ويتجوز بالمرة وانت إيه ظروفك  
هتقدملي إمتي؟! ودا سؤال بتسأله وهي كان خلاص أغراها حياة حمادة

وشقته اللي شافت صورها ع الواتس وعربته الجديدة.. وهو بيدأ يمهد  
للموضوع انه لسا قدامي كثير عشان اكون نفسي واتقدمك وكدا هتستني معايا  
يابنت الناس سنين! إنتي أكيد تستاهلي واحد احسن وأشرف وأحمد وأسعد  
وأجدد مني \*ودا بقولها بشكل غير مباشر انا لقيت مزة شربت نفس القلب  
اللي ادتهولك.. طريقك اخضر \* وبسيبها تعيطلها شوية مع أغاني مصطفى  
كامل وروايات أحلام مستغانمي وكام بوست فيلينج ساد عالفيس وهو بينزل  
يشيش ع القهوة ويصع البنات عادي جدا!

و الغالب البنت هي اللي بتكسب في المرحلة دي لأنها بتطلع بدور المخرجة،  
وهو ووب تجري الأيام والشهور ف تتخطب وتنزل صورة فيها إيدن بس بدليتين  
وبتنسى كل حاجة وكام شهر وتنزل صورتها منتقبة وشاللة بيبي وجنبها جوزها  
وتكتب "زوجي قرة عيني"، وهو بيكون خلص جيش واتجوز بنت خالته البيضاء  
التخينة وكرشه يكبر قدامه ويركب الأتوبس بطيخة.. وهما الاتنين بيعيشوا  
روتين ممل زيههم وبينسوا كل حاجة، بينسوا انهم كان ممكن يكملوا لو مافقدوش  
حمة التقدير والاهتمام والثقة، ودول أهم أعمدة أي علاقة.

#حمادة لعبها صح.



## أول قصة حب

وما إننا بتكلم عن الحب .. مفيش حد فينا وهو صغير ما ارتبطش بقصة حب علقت معاه أو حتى فضل مَعيش نفسه فيها .. بالنسبالي انا فاكر ان أول قصة حب ليا كانت في رابعة ابتدائي .. البت "مي ام شعر اصفر" .. وتقريباً مكنتش لوحدي اللي معجب بيها كان الفصل كله .. وماكش الفصل كله بس .. كان الدور كله .. وماكش الدور كله بس كانت المدرسة كلها .. وكان كل واحد في الفصل بيحاول يلفت نظرها، وانا من صغري كُنت مُتيم بالسينما والأفلام وكنت دائماً بشوف المشهد اللي لما البطلة تكون بتعدي فيه الطريق وتكون جاية عربية سريعة فالبطل يجري عليها ويقولها "حاسيبيبيبيبي" ويقوم واخدها وواقعين ع الأرض فتعجب بيه وتبدأ بعدها قصة الحب العنيفة .. فقولت طب ما اعمل الحركة دي معاها واحنا خارجين من المدرسة وابتقى في



ونسينا ان الناس بتتفرج علينا وهي واصحابها فضلوها يضحكوا. . ومن  
وقتها لو قابلتها صدقة ف الشارع نبص لبعض ونضحك ونمشي ولما يجي مشهد  
في التلفزيون البطل بيعدي البطلة بقلب على طول.







## قضايا تۆرق المجتمع

## يا غشاش

الغش من أسهل الحاجات اللي ممكن يعملها الإنسان في حياته الا انا عندي  
مشكلة دائماً اني مابعرفش اغش.. مش مش عايز اغش لاء مش قادر  
اغش.. وبتقفش لما مجاول.. فاكر أول مرة غشيت كانت في أولى ثانوي الترم  
الأول وماكتش مذاكر مادة العربي ولا عارف فيها كلمة فقولت لصاحبي: هنعمل  
ايه؟

قالي ياعم نبرشم.. قولتله ازاي؟

وهنعرف نطلعه في اللجنة؟

قالي: أه بص انت اسهر النهاردا اكتب معظم الأسئلة وإجاباتها في ورق صغير  
تعرف تقراه وأول ما تستلم ورقة الإجابة بيكون لسه المراقبين مشغولين بتوزيع  
الورق..

فتقوم انت مطلع البرشام كله اللي معاك وحطه في ورقة الإجابة وطول  
الامتحان بقا سلك أمورك.

قولته إشطة.. وفعلاً عملت البرشام ولبست بنطلون فيه جيوب كثير  
فقسمت فروع المادة عليه.. ماهو يانعمل غش محترم يابلاش آه..

جيب للنحو.. جيب للبلاغة.. جيب للقصة.. جيب للقراءة.. الجيب  
دا كبير فخليته للنصوص.

وجينا الصبح في اللجنة وهما بيوزعوا الورق.. فانا كت قاعد في أول صف  
ع الشمال من ناحية الباب في أول ديسك وكانوا المراقبين غالباً بيقتعدوا ف النص  
أورا.

تقريباً واثقين في اللي قدام.. المهم استلمت الورقة من هنا وبدأت اطلع  
البرشام كله واحشره فيها من هنا.. كانت أشبه بالمرتبة القطن..

قولت ابدأ باللي الحق احله وسييت التعير في الآخر.. شوية ولسا هبدأ  
افتح برشامة القصة والاقيلك مراقب الدور داخل علينا سليمان عيد في نفسه  
كدا بابتسامته اللزجة: صباح الخير ياولاد كلسناوات تطايين يارب يكون الامتحان

سهل بالتوفيق ان شاء الله بصوا يا اولاد بالنسبة لورقة الإجابة أنا كدوا من عدد الورق فيها انهم ٢٠ ورقة وأه وأول ورقة دي طبعاً بتسيبونها وتبدأوا من هنا .

فقام عيل غبي قاعد ورا قاله: فييين دي يا أوزساااز؟!

فقام شادد ورقتی بيشرحلهم عليها . .

ويسألني عن شلالات برشام نازلة من الورقة . . نصوص قصة بلاغة نحو قراءة  
بسم الحمد لله البلاغة ما وقعتش .

هو شاف البرشام نازل من هنا وقالي الله يخبريتك إيه يا ض دا كله هي اللجنة  
لسا بدأت! ومستعجل على إيه ياخويا!

وكان هيتعملي وقتها محضر غش بس عدت على خير وفضلت قاعد طول اللجنة تأمل في خشب الدسك وكيفية دق المسامير.

والمراقبين يقطّعونني بكلامهم ونظراتهم وصاحبي قاعد بيضحك لرا وعارف  
يطلع برشامه ويحل وانا هموت وابلغ عنه.

#المراقب: مكنتش متخيل انك كدا يا غيشا||||||ش.



## قضية رقص عام

بقلب التلفزيون فلقيت إحدى البرامج الهادفة من غير ذكر أسماء عشان الرقابة "ليلة سمر" حيث استضافت المذيعة ٤ راقصات م اللي وسطك يحبهم وعملتهم تقرير عن حياة وكفاح كل واحدة..

منهم ٣ عرب vs واحدة أجنبية اجتمعوا لتناول أهم القضايا المعاصرة على ساحة هز الوسط.

العرب كانوا نجوى فؤاد، والثانية لوسي، والثالثة اسمها هندية \*بس مصرية\*..

الست هندية لما المذيعة سألتها اعتزلي لي من ١٤ سنة رجعتي ثاني دلوقت تعني؟! قالتها أصلي حَجيت وكدا فاعتزلت ورجعت اغني عشان قوت مينفحش ارقص بعد الحج بقا هاها..

قاطعها لوسي قائلة: بعض الراقصات بقى بيهون عليهم جسمهم وأرجو منهم الالتزام بالزي، وأه الرقص مش حرام طبعًا.

أما نجوى فؤاد لما اتسألت رقصتي قدام ملوك؟ قالتهم أه ملوك وفقرا وبنفس  
المستوى عُمري مافكرت ارقص بشكل مختلف قدام الرؤساء والملوك. . كله زي  
بعضه. كان فاضلها شوية وتستشهد بأية قرآنية .

وأكملت الأوسازة نجوي فؤاد الحديث عن إنجازاتها ومبادئها اللي مش  
هتقيدنا بحاجة كمشاهدين، بتقولها عارفة ياسمر انا وزير معرفش إيه جه سألني  
مرة انتي متجوزة؟! قولتله أه متجوزة، قالي طب ما تيللا ونجيب عبد الله. . كان  
عايز يتجوزني عُرفي، بس انا رفضت بشدة، انتي عارفة يا سمر أخلاقي  
ماتسمحليش .

#لوجواز رسمي ماشي إشطة كنت اخد اتنين اهو اللي يعطل الثاني يكمل  
هاهاها . .

#مانقومي تهزي يا أوسازة نجوى ولا جالك لين عظام؟

#المهنة مبقاش ليها احترامها .



## #أنستا\_تفاهت

حب الاستطلاع بجانب اني اشترت موبايل جديد كاميرته بجودة عالية  
دفعوني اني اعمل أكونت علي أنستاجرام.. معروف ان أنستاجرام مكان لصورك  
عشان الناس ماترهبش منك ع الفيس فاحنا بنعمل ايه بقا؟ نتصور ونزله ع  
الأنستا ونعمل مشاركة ليها ع الفيس! المهم اني فضلت مسحول فيه شوية..  
والحقيقة الناس على أنستاجرام غريبة جداً.. خصوصاً البنات لقتها بتصور  
حاجات غريبة في نفسها! اللي مصورة خدودها.. واللي مصورة رموشها..  
واللي معجبة بكعب رجليها الشمال.. واللي مصورة الحنة اللي في قفاها..  
واللي قاعدة قدام التلفزيون فمصورة مشط رجليها.. واللي تعبانة فمصورة نفسها  
بالكانيولا والحلول.. واللي مصورة ايدها في المطر.. واللي مصورة ضحكها  
مابتهرش وجمالها مايتقدرش وياقلمي ماتستهترش بواحدة في رقتها! واللي مصورة  
دموعها.. واللي مصورة خشوعها.. الموضوع ممل جداً يعني.. والناس بقوا

مقلدين بشكل غريب! لما اقوم اخذ سيلفي شبشب امي عشان اتأخرت ع  
الفطار.

#بيرشق #أي #شبشب بلاستيک #ماما #قلوب #هفطر #هنزل #هلبس  
#باي.

#حبيبي انا بشوف فيك حياتي.

#وانا بشوف کل حاجة عالأنستاجرام.





## محدثش عارف الخير فين ؟

كنت معزوم في فرح بنت جارتنا وحصل موقف غريب أثبتلي بجد إن الدنيا دي ضيقة أوي وفي لحظة ممكن يتبدل فرحك لحزنك وحزنك لفرحك . . اللحظة ماكتش لما العروسة تدي ضهرها للمعازيم وترمي البوكيه لاء ، ولا لما الرقاصة بتدخل ، ولا لما أشبه على بنت وتطلع هي فعلاً بعد كمية الميك أب وتشطيب الشقق اللي حطاها ، ولا لما بتاع الدي جي السيئل يقول "يلا بينا اصحاب العريس يحوا هنا بليز" ، ولا لما ابن الظرفية اللي بيحط الشوكة في النص بعدين يشيلها أول ما العريس والعروسة يحوا يكلوها ونضحك عليها كلنا للمرة المليون علشان هي حركة دمها خفيف وروشة جداً وجديدة ! ، ولا لما اللحظة اللي يجوا يشربوا الشرابات ويعملوا حرف إكس كده ويدلدقوا على بعض ، ولا لما يشيلها عشان يلف بيها وتطلع زي البغلة فتقع عليه ، ولا لما مصور الفيديو يزوم على شفايف العروسة وهي بتوشوش عريسها بتقوله "عايزة أعمل بي بي" ويضحكوا. اللحظة اللي بجد كانت هي لما الراحل بتاع البوفيه كان بينزل

الكانزات ع التراييزات وأنا قاعد أقول "يارب ميرندا برتقان يارب ميرندا برتقان"  
قام منزلي "سيفن أب" وأنا عايز ميرندا برتقان قمت روحت للواد أخو العروسة  
بدون ذكر أسماء وقولته

- بقولك ياعمد : أنا عايز ميرندا برتقان مش سيفن ..

قام منفضلي قولت الحمد لله على كل شئ ورضيت وفضلت قاعد أبص ل  
السيفن أب وأنا حزين ومتضايق .. وفجأة لقيت طفل برئ جميل بخدود جاي  
من بعيد وحواليه هالة بيضة وجناحات جاليلي وفي إيده إبيه ؟! "ميرندا برتقان"  
وبيقولي أجمل جملة سمعتها في الفرح وفي حياتي عموماً :

- عمو عمو أنا عايز سيفن ..

عيني دمعت وقشعرت من اللحظة وقمت حضنته وبوسته وبدلت معاه  
الكانزات وأنا بيعيط . وعرفت وقتها بجد إن الخير اللي عملته في الدنيا ورميته  
في البحر هيرجعلك ميرندا برتقان أو شوف إنت بتحب تشرب إيه بقا .



## إبنك مصري يا حج !

ليل داخلي ف مستشفى - صوت صرخ ينتهى بكاء طفل أعلن عن قدومه ،  
تخرج الممرضة للأب : مبروك يا فندم جالك ولد زالقمر .

- يجد ألف حمد وشكر ليك يارب ، اقدر اخش اتظمن ع المدام ؟

= هيا شوية وهتنتقل للغرفة تقدر تظمن عليها هناك .

✱ ف الغرفة ✱

- حمد لله ع السلامة يام ..... هنسميه إيه صحيح ؟ إيه ده هوفين

الولد ؟!!

- مش عارفة الدكتور جه وخده .

= خده فييين ؟!

\*يخرج يسأل الممرضة بقوله ان الطفل مع الدكتور يعمل معاه زى مايعمل كل مرة مع اى طفل يتولد على ايده ...\* بإستغراب ييجرى ع الحَضانات يلاقى الدكتور قاعد يلعب ف سيكولوجية الطفل .

= انت بتعمل ايه يادكتور ؟!

- إنت أبو الطفل ؟ ، إتفضل إرتاح ثوانى وأفضالك .

= تقضى من ايه !! وايه اللي بتعمله دا ! ومالك قافش ف سيكولوجية الواد كدا ليه !!

- هو حضرتك معاك اى جنسية ثانية غير المصرية ؟

- لاء

- خلاص بقا تسيبنى اشوف شغلي

= مش لما أعرف بتعمل ايه ؟!

- حضرتك مصرى وبالتالي إبنك هيحمل نفس الجنسية فأنا كنت لازم أهيبى الطفل نفسياً لده ، يعنى لعبت في حبة صفات هيتصف بيها لما يكبر ، حظيت فيه "البلاهة والهطل" ، أصل ليه يفضل ذكى لحد سن ٦ سنين

ويحش بعدها مدرسة حكومية يصاب بتخلف من اللى هيدرسه !  
ويحفظ الجغرافيا زى البهيم ويفضل يردد جمل من نوعية " مصر من أعظم  
البلاد السياحية في العالم وتحمل ثلت اثار العالم " وهو آخر سايج زارنا  
كان في فيلم شورت وفائلة وكاب ! ، ليه يقرى على سور مدرسته  
"مدرستى نظيفة جميلة متطورة منتجة" والعيال تبقى بتلم الزبالة في  
حصص الألعاب ! ، تانى حاجة ضفتها ف شخصيته كمصرى القناعة  
"والقناعة كنزاً لا ينفع" وطالما قرر يعيش ع الارض دى لازم وحتما يبقى  
قنوع او يموت وهو بيحاول ، لازم يطلع قنوع بالميا الملوثة والاكل المسرطن  
والجو اللى كله دخان وتراب وكلكسات العربيات عمال ع بطل والزحمة  
وعرق المصريين عموماً .. واهم من كدا لما يكبر ويدخل الكلية  
ويصاحب واحد ابوه دكتور المادة او مصاحب دكتور المادة او مصاحب  
واحد يعرف دكتور المادة وقتها مايفكرش يذاكر ويجتهد والهوى دى أملاً  
إنه يعنى يتعين معيد او يشغل منصب مهم في الدولة وخصوصا لو أبوه  
عامل نظافة "سورى يافندم دا مش كلامى" .. شهادته دى هيحتاجها  
لما يروح يقدم ف اى فرع كتاكى او بيتزا هت ، بتحب البيتزا هت ؟

= ..... !!

. وبعدين لو طلع عنده موهبة وفكر للحظة انه هيبقا فنان مشهور ويبدء  
من الصفر وكدا .. فانا قدرت بمساعدة دكاترة جراحة المخ والأعصاب  
باننا نلعب في فص المخ ونشيل منه فكرة الطموح عموماً ... حضرتك  
شايف حتى التمثيل كل ممثل بقا واخد ابنه ولا بنته تحت باطه يمثّلوا  
معاهم وطلبة المعاهد نفسهم يشتغلوا كومبارسات ومجاميع او جمهور  
برامج يفضلوا يصتقفوا للضيف اللي بيبقا غالباً ابن ولا بنت الممثل ..  
قمة الفش.. النفسي يعنى !! أنا كمان ضيفت لسيكولوجيته كمصرى  
"الكذب والتحوير والعشوائية والسطحية والانتخه والإهمال والعنصرية  
والبلطجة والهمجية والصوت العالى "

= أيوا بس للأسف يادكتور مجهودك دا كله راح ع الفاضى بعد ماتشوف  
الكارنيه دا

- إيه ده حضرتك في الداخلية .. آسف جداً يافندم هرجع لإبنك كل  
حاجة مكانها ده ٥٠% وحنة فلوس إبنك يتقاله ياباشا ، وحيث كدا  
يعنى انا كان ليا طلب بس عند حضرتك .

= إتفضل .

. إمبراح كنت ف شارع جامعة الدول وركمت اشترى فول من التابعى

وللاسف عربيتى اتكلبشت تعرفشى حد ف المرور تكلمهولى ؟.

\*بيخرج وراه وهو شايله ابنه ويقوله " ربنا يخللنا سعادتك ويخليلك الباشا

الصغير\*.







## مواصلات

## مترو

المواصلات العامة هي المكان الوحيد اللي بيحسس المصريين بإنهم عيلة واحدة.. سواء كنت في ميكروباس أو أتوبس تقل عام أو في مترو محشور تحت باط اللي جنبك.. ففي يوم من الأيام حصلت ظاهرة كونية نادرة الحدوث بتتكرر كل ١٠٠ سنة ضوئية، كنت راكب المترو وقاعد على مقعد! وبقراً في كتاب ومندمج جداً.. دخل بياح: يلا احضرات سمعوني صلاة النبي، اتفرج بقا ياعم اتفرج يا أوساز ركزي معايا يا أنزة خمسة جنيه طقم فرش السنان اهولا هقولك بتمن صناعة ولا بتمن بضاعة وجرب قبل ماتطلع أي حاجة من جييك \*ماعرش هيجرب فرشاة سنان ازاي! اللي هو هيتمضمض ويتف علينا يعني ولا ايه؟! مش موضوعنا\*.. الحلوف كل دا بقا انه كان بيلف يرمي فرش السنان على رجلين اللي قاعدين ولما جه عندي عمل skip.. الحقيقة احترمه جداً انه شافني مركز في الكتاب ماحبش يسخف ويرميلى الفرش عليه فيقطع

تركيزي! خيلنا نعرف ان ثقافة ال marketing عند البياعين تحسنت الفترة الأخيرة.

شوية ودخل زمايله العربية بأحزمة جلد وكشاكيل وطقم شوك وسكاكين راموهم كلهم في حجرى، لقيته فجأة هو كمان افكر انه مارماش حاجة فرجع رمى عليهم الفرش .. هااا اسود!

#تمام في حد هيرمي حاجة تاني؟!

#استني اطنط هترمي زبالتك ليه م الشباك ارميها هنا .

#ايه يا أوساز دا حررتك بتطفي سيجارتك ع الارض كدا عادي طفي هنا ياراجل .

#بئسألني عن حمام عملي بي بي لابنك فيه ليه امدام؟ وانا حجرى فيه مكان فاضي ميصحشكدا!





## أركب زقازيق منين لو سمحت؟

في يوم عاصف ما طعلتلوش شمس كنت في طريقي للشرقية لحضور خطوبة  
أعز اصحابي .. كتبت معاناتي وانا محشور ورا مش في الكراسي لاء، فيما بعد  
الكراسي .. مع صديق عزيز برضو "مهندس مدني اتعرفت عليه"، مبدئياً دي  
كانت أول مرة في حياتي اركب قطر وآخر مرة ان شاء الله .. المهم الموضوع بدأ  
لما وصلت لمحطة مصر وانا بتمختر وكلي ثقة اللي هو "عادي قطر يعني هقطع  
تذكرة مكيف واركب برنس جنب شباكي هاند فريهي في ودني كتابي في  
إيدي .. كل ما اعدي على منظر طبيعي خلاص اصوره بالموبايل وكأني في سان  
فرانسيسكو .. لحد ما قطعت شرودي مدام سوسن على شباك التذاكر: أستاذ  
أنت يا أستاذ واقف هنا ليه؟! ده شباك ذوي الاحتياجات الخاصة.

— أه آسف طب اقف فين؟

= إتفضل اقف على أي شباك من اللي ورا يلا اتلحاح وسع لغيرك.

\*بص كدا لقيت طابورين حريمي وطابور مختلط ومفيش رجالي ولا أي حاجة على مقاسي.. خبطت على كف واحد شبه أوساز توفيق الدقن بصوته وحنجرته\*..

- لو سمحت ده طابور تذاكر الزقازيق؟

= إيبيه تذاكر الزقازيق دي ما كلها طواير اقف وخلص!

- إشطة متشكر.

= إيبيه رايح فين! انت هتقف قدامي.. اقف ورا.

شوية وجت ست بيضة زالقشطة عينه كانت هتطلع عليها ولقيته فجأة قلب هاني شاكر في نفسه وقايلها إيه ده هتقفي ليه ورا وتزققي نفسك.. اتفضلي..  
وقام مديها دوره.

- أما راجل علق صحيح!

[illegible]

- لو سمحتي .. لو سمحتي دي تذكرة مِنيا القمح انا عاوز زقازيق!

قالتلي: أوووف.. بجد؟! طب الزقازيق كومبليت آسفة.. بص اركب بيها وحاول تزوغم الكُمسري.

.....

**\*موظفة شباك التذاكر بتقولي زوغ هاار اسود\*..**

المهم كان القطر طالع ٣:٤٥ وخلاص ماشي وانا قاطع مكيف ومتلخبط  
ما بين العربيات فقوت للي ع الباب "شدني يا أخ" . . ياعم انا قاطع مكيف  
بتدخلوني الحمام لبييه! طلعت ركبت الدرجة العادية . . ريحة قمية . . ست  
ابنها الصغير عمل بي بي بين العربيات فقلاب العربيات كلها وبتاع الشاي معدي  
وست بتسول وراجل كبير نايم وطالب بذاكر وأب شاي فاكهة والجو حر  
وبيومي فؤاد . . كل ده وانا بتمنى ما اعديش للدرجة المكيفة لاء اخرج م القطر  
خاالص . . أخرج أي محطة . . المشهد كان منتهى البؤس لما وصل الكسري  
وعايز يعدي يشوف التذاكر ووقف مكانه وعينه نظرة بائسة من ريحة باط اللي  
قدامه وضحكة بيومي فؤاد اللي على وشوش الناس كلها كأنها بتقوله "لوراجل  
تعالى عدي".

#سح-م . . سكك حديد مصر = سحلة حر مميتة.

#بهر من القطر واركب ميكرو باص بيطلع السوق بيومي فؤاد .

#وراجل قاعد جنبه يركب الستات البيضة زالقشطة اسمه توفيق .









## معرض الكتاب

وعلى ذكر معرض الكتاب مكش ينفع ما اذكرش أول يوم كان ليا في المعرض  
.. عادة أنا بروح معرض الكتاب من صغري لكن السنة اللي فاتت كانت مختلفة  
لإن كل مرة كنت ببقى موجود في المعرض كقارئ المرة دي كنت موجود بصفتي  
كاتب .. فلبست وروحت بدري ولسه واصل والآفيلك زحمة عند الصالة اللي  
فيها جناح دار النشر وكلهم بيصولي !! قولت للدرجادي الواحد معروف ..  
لاء دانا أترسم عليهم بقا وأمنع أي لقاءات صحفية بتخفق بصراحة ما برتحش غير  
في لقاءات التلفزيون .. وأول مابدأت أقرب هما بيقربوا .. أقرب فيقربوا ..  
أقرب فيقربوا .. لحد ما شاب ميل عليا وقال لي هاه جبته ؟

- هو إيه اللي جبته ؟ ما هو جوه ! انتوا ما اشتريتهوش ؟

= نشترى إيبه خلص الناس عازة تحش الحمام

- حمام إيه طيب ماها توا أوقعلكوا وروحوا

= توقع إيه ياعم فين أم مفتاح الحمام

وقاموا قافشين فيا وانا مش فاهم فيه إيه

\*طلع الحوار إن فرد الأمن اللي في المعرض قالم إنّه بعت واحد المكتب  
يجيب المفتاح وشايفيني انا طبعاً بس اللي جاي عليهم وباصصلهم ومنشكح  
اوي\*

قولت يلا مش مهم .. ودخلت قعدت في جناح دار النشر بتأمل في السقف  
ومنبر جداً بالجلس المقشر اللي بيقع وقاعد عمال أتقاده ، زهقت لقيت بنوّة  
صغيرة وأخوها قاعدين في الجناح اللي جنبنا ع الارض بيضربوا في سندوشات ،  
فروحت قعدت ألعب معاهم وبالمرّة كمت لسه مافطرتش يعني ..

شوية وبنت كدا في منتهى الأناقة واللباقة والشياكة .. جت عشان تشتري  
الكتاب وحبّت تاخذ توقيع الكاتب عليه فسألت إذا كان موجود ولا لاء ..

فندهوا عليا قومت رايحها وأنا في إيدي السندوتش قولتها : أهلا وسهلاً أمري أنا  
الكاتب.

لقتها بصتلي كده من فوق تحت وقالتي : شكراً .. ومشيت !!

#في إيبه انا كنت باكل عادي أومال لو خارجك م الحمام !

#تكونشي زعلت عشان ما عزمتش عليها بالسندوتش ؟!

#طب دفعت تمن الكتاب ؟

#خوووودي أبت



## الفهرس

٥	إهداء
٧	مش مقدمة
٩	طوارئ
١٣	نموذج طبي ١١١
٢١	لباس مودي
٢٧	أوساز غسان ماقولتليش هعمل إيه!
٣٣	زيارة مفاجئة
٤٣	إلحقوني ابني جاله داء النوم
٤٧	الحالة بقت زالفل
٥٣	أبوس إيدك كفاية عينات
٥٧	دكتورة/ شاهيناز
٦٣	عقبال عندكم
٦٩	أسانسوور!
٧٣	ماما حلوة
٧٩	مستشفى الدمرداش .. هنحط عليك وتقول عاش
٨٥	رحلة مدرسية
٩١	ضكطور إصلاح
٩٥	مين اللي كل الجبنة؟!
١٠١	مشروع النهضة
١٠٥	الوفد وصل
١١١	إيه رأيك في العثير؟
١١٧	عجبك العثير * الجزء الثاني *

١٢٥	خوود ذاكر للواد .....
١٣٥	بقدونس ولا كُسيرة؟ .....
١٤١	ألاقيش معاك بصلتين؟! .....
١٤٧	هو كتاب الإجابات بيقول إبييه؟! .....
١٥١	كل سنة وانت طيب .....
١٥٦	مان أوف اميوسيول .....
١٥٧	الصلاة خير من النوم .....
١٦٠	سُكر بره .....
١٦٣	قولي نصيحة .....
١٦٦	العيد فرحة ياعم حسن .....
١٧٠	إجيبشان لف استوري .....
١٧٣	أول قصة حب .....
١٧٨	ياغشالاش .....
١٨١	قضية رقص علم .....
١٨٣	#أنستا_تفاهة .....
١٨٥	محلش عارف الخير فين ؟ .....
١٨٧	إبنك مصري يا حج ! .....
١٩٤	مترو .....
١٩٧	أركب زقازيق منين لو سمحت؟ .....
٢٠٣	معرض الكتاب .....

شكر خاص..

الفنانة: عير وارث